

COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Corinto pueya

1 ¹⁻²Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pablóni, Jesucristo jiyarosano na rupaa cua pohuatanura taa Pueyaso paniquiaaricua-jani. Canaa niaacuara naajiyani, socua canaa niishitiojonura niajaniya, Pueyaso saquirojosano pueya nia quiniuucua. Niaari maninia quiya Pueyaso niquiara, Jesucristo nia rupesacari. Niaari seetanujuanaa Pueyaso muerasu, puetunu jiyacajinia pueyatajanaa, canapuede Jesucristoocua tiuujiacacuajani. Jesucristocuaaari nojori Jiyaniijia, pa Jiyaniijiajuhuaj. ³Pa Que Pueyaso, pa Jiyaniijia Jesucristo cuaara cumaquiiria niajaniya, juhuajaniya nia quiniuria.

**Paari maninia miishaaquiaani
Cristo pa rupesacari**

⁴Maninia nia quiniuucua, janiyari pueyaracaanu Pueyaso sequequiaani “Paacarasho”. Pueyasocuaaari jiyano-hua maninia miiquiaari niajaniya, nia rupesacari Jesucristo. ⁵Nia rupesacari Jesucristo, Pueyasoori puetunu cumaqui-aria niajaniya na cumaacata, nia poojotanura puetunu na rupaajanaa, puetunu na rupaajanaa nia niishiniuriajuhuaj. ⁶Maninia nia tojtiasacari Cristojiniji pohuatasano, niaari maninia

miishaaquiaari taa canaa sequequiaari niajanियacuajani. ⁷Naacujitij, niaari tari masequiaari puetunu Pueyaso niquitionu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacariuhua. ⁸Pueyasoori nia cumaquiniutianiya pueyaracaanu, maja quenaaja niaacua casaa tiutiasoo quiniuria, sesa nia miishanojiniji. Naacujitij, pa Jiyaniijia Jesucristo jaara tiuquiriohua na ruuretajaca na saniitio-nura, niaa cutaraari juhuajaniya quiniutianiya. ⁹Pueyasocuaaari maninia tohuateequiaa na sequesano. Nojuacua-jaari pa sequequiaari pa cojiniuria Neyanu, maninia pa miishaanura Neyanutajuhua. Cuno Neyanuni, nojuacuaaari pa Jiyaniijia Jesucristo.

**Pueyaso muerasu juhua
tamasaca niquitiooquiaari**

¹⁰Cuarta Jesuucua tiuuniaanaa, cua tojtitiare. Pa Jiyaniijia Jesucristoori cua sequeteya nio. Maninia nia niishiriojore. Maja juhua tamasa nia niquitioonu. Maja tamasa niajaniya. Maninia nia niishiriojore, maja tamaatia. Nia jiuujiaa-tioorejuhua. ¹¹Naa nia sequeyanijia cuarta Jesuucua tiuuniaanaa, Cloe niquiohua pohuatanuucua janiya niajanियajiniji. Nojoriiri cua sequerucuaa niaana juayonuujutaquiaa. ¹²Naa pohuatasaarucuaa niajanियajinijiniija:

puetunu pueyajanaana tama sequequiaa-
jaaja: “Canaari Pablo pueyani”.

Tamasacanaari saniniuujia sequequiaacu-
jua: “Canaari Apolo pueyani”.

Tamasacanaari sequequiaajaacuhuj:
“Canaari Pedro pueyani”. Tamasacanaari
sequequiaajuhuj: “Canaari Cristo
pueyani”. ¿Naatee pueyanaa? ¿Casaara
tamajaaja naa nia raquitiijiquianuni?

¹³¿Majateeri nia niishiniu? Paari Jesucris-
to cuaqueyani. ¿Pa Jiyaniijia
cuaqueyateeri neequeresetanocuaa?

¿Janiyateeri niaacuara cusoquiaari
niyacutesanojiniani, cua pueya nia
quiniuria? ¿Niaateeri cua sesajinia
tiuquinijosaaquiaari moojiniajuhuaj?

¡Maja, cuarta Pueyaso pueyanaa!
¹⁴Janiyaquiiri namitia nia tiuquinijia-
quiquiaari moojiniani. Naacujitij,
majaari nia naata sequenu niaa cua
sesajinia tiuquinijosaaquiaari. Janiyari
niishiya cutarani, janiyari saaja Crispo
tiuquiniquiaarini, Gayonio. ¹⁵Naacujitij,
majaari quenaaja tamonu na naata
sequenu janiyari na tiuquiniquiaarini.

¹⁶Quera niyajetaanjia. Janiyari Estéfanás
tiuquinijioquiaarijuhua necohuatajani.
Majaruhua socua pueya cua tiuquinijionu
quiquiaari.

¹⁷Jesucristoori maja na jiyaronu
quiquiaari janiya pueya cua tiuquinijionu-
ra. Cristo cutaraari cua jiyaroquiaari na
rupaa cua pohuatanura. Majaari cua
maniniushitini na rupaa cua pohuatasacari,
pueya mariqui shanohua cua
pohuatasanoocua tiuuri najuhuaanaari.
Cuaara tiuutiurria cutara Jesucristoocua,
na miiniuucua maninia pocuara.
Pueyasoori pa jiyanoocua saaja Jesucris-
to cusonuuca niyacutesanojinia pocuara.

**Cristoori Pueyaso cumaaca jiitiaa,
Pueyaso niishitiajajuhuj**

¹⁸Canaa pohuatasano Cristo cusunujini-
ji niyacutesanojinia pocuarani, cunoori

juhua mosanucua pohuatasano shaajeco-
riquiiano pueyara. Naajaa, Jesucristo
rupaari Pueyaso cumaacaracacuaa na
tojitiaanaara, Pueyaso muerasura na
jataniniuria pajaniya. ¹⁹Pueyaso seques-
nocuajaari naa naajiotasaaquiaritij:

“Janiyari niishijiaca niishishano
cushitionutaniyani. Mijiria pueya
niishishano jiyatenutaniya
najuhuanaranijia”.

Naacujitij, cante mijiria pueya niishisha-
noocua tiuyani, nojuajaari maja na
jiyanooshaanu quiniutianiya.

²⁰¿Pueyanoteeri jiyanhua niishitiaja-
raca Pueyaso muerasura na jataniniuria
pajaniya? ¡Maja! Niishijiajanaa jaara
jiyanohua niishiriojore, ¿pa naatate na
sequesanoocua tiuuniu, Pueyaso na
jiyanootiniuria pajaniya? Maja. ¿Niishi-
tiojona rootasanote na naata Pueyaso
pueyara jiyatenu pajaniya nocua pa
tiuushacari? Maja. Naacujitij, puetunu
mijiria niishishanojuanaari najuhuaana
quiya Pueyasora. ²¹Pueyari maja na
naata Pueyaso niishiniu quiquiaari tama
nojori niishitiajatajaaja. Pueyasoori tama
sequequiaarijiaaja na niishitiajata cutara:
“Jaaja. Maninia naatej. Pueya
jiyanooriiria saaja nojori tiuusha-
cari cua Niyanuucua”.

Pueyari saniniuujia jiyaniya Jesucristo
rupaari nareja sequesanojuhanaj,
tojishoo. ²²⁻²³Naaratej, cuarta Judiocua-
caari maja Jesucristoocua tiuuniaara na
quiniu ritia. Nojoriiri Pueyaso cumaacata
miishano niquiniu paniquiaa coteenu
saaja. Cunora, nojoriiri canaa tojtiaaqui-
quiaa canaa pohuatasacari Jesucristo
mosaanujiniji niyacutesanojinia
teetesano. Nojoriiri saaja sequequiaa:
“¿Pa Jiyaniijiaranotucua casaara na
cararaatia mosaareni?” Griego pueyari
naajuhuj. Majaari ritia nojori quiniu
paniniu Jesucristoocua tiuuniaara.
Nojoriiri saaja niishiniuucua jiaatiajaca.

Nojoriiri jiyaniya Jesucristoori najuhuana cusoquiaari juhua moseeca. Naacujitij, canaa pohuatasacari Jesucristo niyacutesanojinia mosaquiaari, Judiocuacaari jiyaniya Jesucristoori cumaacaaju quiquiaari. Nojoriiri jiyaniyajuhaaj Pueyaso Jiyarosocoriquianoori ritia Judiocuaca jiyaniijia quiniutianiya cutara. Majaari na niishitiuniu quijia Cristo cuara coteenu miishaaria naquiya, jiyanooshano nojori quiniuria sesa nojori mijiosanojiniji. Griego pueyari canaa pohuatasano tojiyaquiquiaajuhua. Nojoriiri jiyaniya Pueyasoori niishiyashijia quiquiaari Neyanu na motenura. ²⁴Paa cutaraari niishiyani Cristoori pocuara cusoquiaari. Naacujitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohuanio. iPueyasoori jiyanhua niishijia cutara! ²⁵Pueyari jiyaniya Pueyasoori niishiyashijia quiquiaari. Cunora Neyanu cusojuaquiaari niyacutesanojiniaari. Naajaa, naacujiti Pueyasoori pa jiyanoocuaiaari. Pueyasoori jiyanhua socua niishijia cutara mijiria niishijiacajiniji. Pueyari jiyaniyajuhaaj, Pueyasoori cumueecaaju quiquiaari Cristo cusosacari niyacutesanojinia. Naajaa, naacujitij, iCristoori Sesaaca shocotaquiaaricuaaja! Pueyasoori jiyanhua socua cumueeca pajaniyajiniji.

²⁶Cuarta Jesuucua tiuuniaanaa, niaacuajaari niishiya taamueca pueya nia quiquiaari pueya niquiarani, Pueyaso sequesacari njaniya na muerasu nia quiniuria. Saaja secaja njaniyajinijnioori niishijia quiriquiaa. Saaja secaja njaniyajinijnioori tojishano pueya quiriquiaajuhua. Saaja secaja njaniyajinijnioori jiyaniijianucua niquiohuacuajinio supueno quiriquiaa. ²⁷Mijiria quiniaa pueyara, Pueyasoori

socua niishiyashijia pueya saquiriojoquiaari, na muerasu nojori quiniuria. Naacujitij, mijiria niishijiaaari tamajaa-caririquiniutianiya nojori jaara saquiriojiyaquishaare. Pueyasoori tojishoo pueya saquiriojoquiaarijuhaaj, na muerasu nojori quiniuria, mijiria tojishano pueya caririquiniuria nojori jaara saquiriojiyaquishaare. ²⁸Pueyasoori soosano pueya saquiriojoquiaarijuhaaj, tojishoo pueyano. Pueyasoori naa saquiriojoquiaari najuhuana quijiaa. Canapuede tama na cuaqueyajaaja jiyaniya cutara pueyanoni, cuno pojoriiri saniniuuja quejoosaanutianiya. ²⁹Naacujitij, majaari quenaaja jyanohua pocuaja cureenu quiniutianiya Pueyaso niquiara. Tojetaarucujanaa shaaquiri pocuajaca quiniutianiya. ³⁰Pueyasojuaanaacuajaari nia rupetequiaari Jesucristo. Naacujitij, niaari Pueyaso niishitaja jitiiaa. Nia rupesacari Jesucristo, niaari maninia mijia quia Pueyasora. Pueyasoori nia jatania saa na tojiijacaraja nia quiniuria, juhua Neyanu nia quiniuriajuhaaj. Nijaniyari puetunu jeecasaanutaniyanaa. Paari naa miishiyani Jesucristo pa rupesacari. ³¹Seetanujuaanaari nio sequesano tariucuacaanu Pueyaso Rupajiniji:

“Cante shuquiriaatia quiniu paniyani, nojuaja cuara shuqiritiaara pa Jiyaniijia”.

Jesucristo mosaanujiniji pohuatasano

2 ¹Cuarta Jesuucua tiuuniaa pueyanaa, janiya jaara niaacua tiuquiquiaarinia, niaacuajaari niishiya taa cua pohuataquiaari Pueyasojiniji Jesucristo rupaa njaniyani. Majaari jiyajeneta cua pohuatanu quiquiaari niishijia niishishano rupaacata. Cua pohuatasanoori niishishaatia quiquiaarijia, maja juhua cutara pueyano pohuatasano. Janiyari jacara pohuataquiaari Pueyaso

rupaa niajaninyani. ²Janiyari tari tama sequequiaarijiaanjia: “Janiyari saaja Jesucristojiniji pohuatanu paniya Corinto pueya niquiarani, naajuhuj, taa na cusoquiaari pocuara niyacutesanojiniani”.

³Cua pohuatasacari Jesucristo rupaa nia niquiara, janiyari sasaca quiriquiaa cua puerenutani. Janiyari tetecariquiaani. ⁴Majaari cua paniniu quiquiaari cua tiutuniuria niajaninya Jesucristoocua tama cua niishitajatajaaja. Naaratej, majaari cua pohuatasano quiniu quiquiaari juhua shanohua pohuataja sequesano. Naacuajitij, cua pohuatasacari Jesucristo rupaa nia niquiara, Pueyaso Sohuanu cutaraari nioojiaajinia poonijioquiaari Pueyaso cumaacata cutara. ⁵Naacuajitij, niaari Jesucristoocua tiuququiaari Pueyaso cumaaca miishacari maninia nioojiaajinia. Maja cutaraari nia tiuuniu quiquiaari saaja pueya niishishanoocua.

Pueyaso Sohuanucuaajaari pa niishitiya Pueyaso

⁶Naajaa, canapueye Pueyasoocua tiuujia seetanujuanaa cutarani, nojoriiri niishiya canaa pohuatasano Jesucristojiniji seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiaacari shaajeconutaniya. Nojori niishishanoori najuhuaa quiniutianiya. ⁷Canaa pohuatasano cutaraari Pueyaso niishishano tarjia, jiya shipinishaacarijiojua. Pueyasoori jiyacari niishiriojoquiaari jiyanojua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitionu quiquiaari pueya tari. ⁸Mijiria jiyaniijnucuaari nio niishiyaquiquiaari. Nojori jaara na niishiquiaari tarjia, nojori

maara pa Jiyaniijia moyaquiquiaari niyacutesanojinia. iNa Shipininia motuquiaarijiaari, pueyaracaanu shacantuuca quijia! ⁹Naa naajiotasano quiyacuajaari tariucuaaanu Pueyaso Rupaajinia:

“Pueyasoori jiyasohuaja casaa jeenucuasano jiitiaa na panijiaa pueyara. Cunoori maja pueya niquishano quenaaja. Majaari cunojiniji nojori tojishano quenaajajuhuj. Majaari quenaaja pueya niishiriojonu quiquiaari jiyano casaate na naata quiniu nojoriria”.

Quiarijiani, canaari saniniuujia pueya niquiara na pohuataani. ¹⁰Pueyasocuaajaari quiarijia canaa niishitiquiaari canaa jiuujiajinia na miiniu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa noojiaajinia niishiya.

¹¹¿Cante pueyano niishiriojosano noojiaajinia niishiyan? ¿Majate saa na camaru sohuanujua niishiniu? Taaquiriirinj. Naajuhuj, saaja Pueyaso Sohuanuuri Pueyaso niishiriojosano noojiaajinia niishiya. ¹²Naaratej, Pueyasoori na Sohuanu niquitioquiaari pajaniya, pa niishiniuria Pueyaso niishishano. Naacuajitij, majaari pa jiitianu saaja tama pa sohuanujuaaja Pueyaso niishishano pa niishiniuria. Paa cutaraari Pueyaso Sohuanuracajianuhuj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niquitiosano pajaniyarajanaa niishiniu. iJiyanojua capora Pueyaso! ¹³Naacuajitij, canaa pohuatasanoori maja saaja mijiria pueya niishishano. Pueyaso Sohuanujua-naari canaa niishitiojoquiaari Pueyaso rupaa canaa niishiniuria canaa jiuujiajinia. Naacuajitij, canaa naata Pueyaso Sohuanu jiitanaa niishitiojonu seetanu Pueyaso rupaajanaa, mariyata taa Pueyaso Sohuanu niishitiojoquiaa canaacuaani.

¹⁴Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuuaaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. ¹⁵Cante Pueyaso Sohuanu jiitiaani, nojuajaari na naata puetunu niishishanojuanaa saniniujiuniu. Saniniuuja, tamasaca pueyari maja na naata Pueyaso Sohuanu jiitiana miishano niishiniu nocuara na rimiaaquenura. ¹⁶Tariucuacaanu Pueyaso Rupaajinia naa naajiotasaaquiarijiuhuj:

“¿Cante pa Jiyanijia jiuujiajinia na niishiriojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacujitij, majaari pa niishiniu saa mijiria pueya niishishano-juua.

Pueyasora poonijionaa pueya cuaara poonijionuuriquia nojori panitioonuta

3 ¹Cuarta Jesuucua tiuuniaanaa, cua quishacari niaata, majaari cua naata jiyajeneta Pueyaso niishishano cua niishitiojonu quiquiaari nijaniya. Niaari quera juhua Pueyaso Sohuanuuju quiriqiaajaa. Niaari juhua Cristo conaaja quiriqiaajaa, maja Pueyaso tojjijaca seetanujuanaa. Nocuaji, janiyari nia niishitiojoriqiaa jacariani, juhua Pueyaso niishiyashijaca pueya nia quishacarijia. ²Cua niishitiojosano nijaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuata- nu quiquiaari nijaniya. Cuno niishishanoori cumueeca Pueyaso pueyara, naatej, taa shu quiya tariucua puereetuca pueyaracuaani. Juhua

naatujoori nia quishacarijia, majaari nia naata na tojiniu quiquiaari. Juhuanojua- jaari maja nia naata na tojiniu quiarijiani. ³Niaari juhua Pueyaso Sohuanuuju quiyajaa, juhua Pueyaso niishiyashijaca pueya. ¿Naatejaaratej? Niaana niarta Pueyaso muerasu shocota- nu paniquiaa juucua. Niaanaari juayonuujuataquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijaca pueya. ⁴Niaana sequequiaa: “Canaari Pablo pueyani”. Tamasaacanaari sequequiaajuhuj: “Canaari Apolo pueyani”. Naacujitij, puetunu nijaniyajanaari saaja juhua Pueyaso niishiyashijaca pueya quiyajaa.

⁵Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhuanani. Canaari saa Pueyaso panishano miiquiaajaani, Jesucristo rupaa nia tojtianura. Canaari Jesucristo panishano miiquiarini taa na sequequiaari canaa miiniuriacuajani. ⁶Naacujitij, janiyari Pueyaso rupaa nia pohuataquiarini, naatej, taa casaa jajau pueyano natojojoquiacuaani. Apoloori saniniuuja socua Pueyaso rupaa nia niishitiojoquiaari na cumaquiniuria nijaniya, naatej, taa pueyano na natau shiijioya mohuacatacuani, maninia na maashiniuria. Pueyaso cutaraari na rupaa maashitiquiaari nioojiacajinia, na muerasu nia quiniuria cutara. ⁷Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojtiniu na rupaa, seetanujuanaa na muerasu pa quiniuria. ⁸Naacujitij, paari niishiyani, cante natoojonani, cante mohuaca shiijiotanani, canaari mariyata saaja Pueyaso poonitijiosanoni. Pueyasocuaaja- ri canaa niqutionutaniya na jiitiasano, nera canaa poonijionuucua. Cante socua

poonijioreeni, Pueyasoori socua na jiitiasanojiniji na niqutionutaniya taajecori pueyajiniji. ⁹Canaari mariyata Pueyasora poonijionaani. Niaari juhua Pueyasora nataacuaca nera. Niaari na muerasu cutara, maja canaa muerasu. Naajuhuj, Pueyasoori juhua nia tiaa saitia, na quiquiorano. Saitia tiasacari, sairi coteenu cumaatia niojoshiya na morijiuria, maja tia matanura. ¹⁰Pueyasora jaara jiyaroquiaari janiya, janiyari Jesucristo rupaa pohuatanu coteequiaari maninia niajaniani, Pueyasora muerasu nia quiniuria nia tiuushacari cua pohuatasanoocua. Naacuajitij, janiyari juhua Pueyasora tiara shipininiu coteequiaarini. Cua niishitiojosano niajaniani, cunoori juhua morijiu nujuatejosano quiquiaari. Cua nuhuaji, tamasaacari nia niishitiojoriquiaa socua Jesucristo rupaa, juhua Pueyasora tia tucuatasaanura. Nojori cuaara niishiiria maninia, maninia nojori niishitiojonura niajaniani, juhua maninia tiasano nia quiniuria.

¹¹Majaari socua tamonu rupaa quiniu nocua pa tiuuniuria Pueyasora pueya pa quiniuria. Saaja Jesucristo rupaa cutaraari pa jataniija Pueyasora pueya pa quiniuria. Janiyacuajaari na rupaa pohuataquiaari niajaniani. Saa na rupaacuaja nia tiuushacari, niocua maninia quiri, juhua maninia morijiu-cuaacua tiasano tia, maja na matanura. ¹²⁻¹³Cante socua Jesucristo rupaa niishitiojiya niajaniani, cuno cuaara niishitiojoora jiyanoehua maninia. Cuaara niyajetaaquiiria cutara, nojuajaari na niishitiojosanojiniji nequesoreesaanutaniya Jesucristo muetasacariuhua pocua, pa miishano na saniniujiuniuria juhua manitia. Puetunu niishishaanutaniyanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanoori

juhua pueyano tiasano. Pueya jaara tiare orota*, platatanio*, shanohua saitiano, maniiri maja na naata na catijianu. Cante saniniuuja tiaree macacatani, tucurutajuhua, turequenacotanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujuanaa maninia?

¹⁴Tamonu jaara maninia miijia quiquiaari Pueyasora cumaacata, na miishanoori maja najuhua quiniutianiya Pueyasora. Pueyasoori cuno pueyano niqutionutaniya na jiitiasanojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaari, maja na tia catenura jaara sanishaare senu. ¹⁵Cante saniniuuja tiaquiaari cateja casaatani, na tiasanoori catenutaniya. Puetunu na jiitiasanojuanaari juurequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesuucua tiuuniaa, canapuate maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

¹⁶¿Majateeri nia niishiniu pueyanaa? Niaacuajaari Pueyasora quiquio, juhua na tia. Na Sohuanuuri nioojacajinia quijia. ¹⁷Tamonu jaara Pueyasora quiquio sesore, Pueyasoori cuno pueyano saniitonutaniya saniniuuja. Puetunu Pueyasora muerasujuanaari juhua na tia quiya. Pueyasora quiquio cuaara quiiria tojetaarucujanaa maninia, saa neraja, maja raquiriojotasano. Niaacuajaari na quiquio.

¹⁸Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyasora niishiyashijia niquiara. Cuno pueyano cuaara jataara cuno na niishishano juhua niishiyashijia na quiniuria narta pueya niquiara. Na nuhuaji, cuaara maseera Pueyasora

niishitiaja, seetanu niishijia na quiniuria-janaa. ¹⁹Mijiria pueya niishishanoori juhua paateca sequesano Pueyasora. Tariucuacaanu Pueyaso Rupaajinia naa naajiotasanoori quiya:

“Pueyasoori mijiria quiniaa pueya cushiriquiitianiniutianiya, tama nojori niishitiushanoocuajaja nojori tiuushacari najuhuanaj”.

²⁰Naa naajiotasanoori quiyajuhuj:

“Pueyasocujajaari mijiria niishijiaa niishiriojosano niishiya. Naa sequeyari: ‘Najuhuaanaari cuno pojori niishiriojonuusano’”.

²¹Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasa pueya jiyaramiquiquiaa nia cumaquiniuriajuhuaj, maja saa niquiriyatu niishitiojonaja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanoocuaja nia jiaatianu.

²²Pueyasoori canaa jiyaramiquiquiaari canaa cumaquiniuria nijaniya. Naacujatij, janiya, Apolo, Pedro, canaari niaara quiyani, maninia canaa miiniuria nijaniya Pueyaso rupaata. Nio jiyari niaara quiyajuhuj. Pueyaso shipinishanocuajajaari niaara. Naajuhuj, mijiria nia quishacari, cunoori niaara quiya, socua maninia quijia nia quiniuhuara. Taa nia miishiya quiarjiacua-jani, taa nia miishaanutaniyani, puetunu cunojuanaari niaara, cumueca Pueyaso muerasu nia quiniuria. Nia shaajesacariiri maninia quiniutianiya niaarajuhuj. Pueyasoori nia shaajeteya na shuriucua nia quianura. Naacujatij, puetunu casaajanaari niaara quiya. ²³Niajaniyari Cristora quiya saniniuuja. Cristoori saniniuuja Pueyasora quiyacujua.

Jesucristo jiyaramiquishano poonijosano

4 ¹Naaratej pueyanaa, nijaniya cuaara niishiiria canaari saaja Jesucristo seyani. Canaari maja cutara

pueyani. Pueyasoori canaa jiyatequiaari na rupaa canaa niishitiojonura nijaniya, Pueyaso niishitiojosano canaa. Cunoori tarijia pa niishishoo. ²Cante Pueyaso niishitiaja jiitiaani, cuno cuaara quiriia seetanujuanaa Pueyaso miiniu panishano panijia, na rupaa na pohuatanura puetunu maninijanaa. ³Niajaniya, tamasa pueyajuhuj jaara sequenu paniya taamueca pohuatanate janiyani, quiria, naajaa. Mijiria nequesoreena jaara cua nequesoreere cua niishitiojonu-jiniji, naajaa. ¿Janiyate sesa niishitiojoquiaani? Johuj. Maja cua niishiniu. ⁴Janiya jaara sesa miiriquiaa cua Jiyaniijiaa cua poonijosacariiri, majaari cua niishiniu. Majaari coojia macuhajenu quijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijiaa na naata sequenu taa cua quiquiaariiri. ⁵Naaratej, maja nia rimiaaquenu tamonuucua, Jesucristo tiuquiquishacariuhua pocua. Nia sashiri. Pa Jiyaniijia jaara tiuquiriohua, puetunu jiyasohua pa miishanojuanaari niishishaanutaniya. Niishishaanutaniya-jaariuhuj casaara pa miiquiaari puetunu pa miishanojuanaani. Cuno quishacari, pa Jiyaniijiaari maninia pohuatanutaniya cante maninia miija quiriqiaa mijiria na quishacariiri.

⁶Cua tojitiare cuarta Jesuucua tiuuniaanaa. Janiyari nareja nia pohuatariquiaa Apolojinijini, janiyajinijiiuhuj, maninia nia niishiniuria casaa cua niishitiojiya nijaniyani. Naacujatij, nia niishitiojori-quiaanjia saa Pueyaso rupaa nia tojitianura suraatiaja. Majaari socua tamonu niishitiojosano nia tojinu. Naajuhuj, maja nia sequenu tamonu niishitiojonajiniji: “Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriiraj, na shuquiritiniuucua janiya”.

Maja naate pueyanaa. Mariyata nia tojitiare puetunu Pueyaso jiyaramiquishano pueyajanaa, seetanujuanaa nojori pohuatasacari Pueyaso rupaa. ⁷¿Niajani-yariuhuj? ¿Taa nia sequeya tama nia cuaqueyajiniijiaajani? ¿Niaateeri socua maninia pueya tamasacajiniji, socua niishijiacajuhuj? Majaruhua. Naajaa, niaa jaara seetanujuanaa socua niishijiacacuir tamonujiniji, ¿taa jiyanoehua niishijiacara nia quiquianuni? ¿Tamajaa-jatee? ¡Maja tamajaaja! Niaacuaajari Pueyaso niishitiaja jiitiaa. Naaratej, maja nia jiyaniniu niaa socua maninia pueya tamasaca pueyajiniji, tama nia niishishanotajaaja.

⁸Niaa jiyoteeri jiyaniya niaa tari cutara niishijiacara quirii. Niaa jiyoteeri jiyaniyajuhuj, niaa tari jiitiaa puetunu Pueyaso niquitionu panishanojuanaa niajaniya. Naajuhuj, niaa jiyoteeri jiyaniya Pueyasoori nia jiyateree jiyaniijianucua nia quiniuria. Niaa naasucuaari canaa shocotaree tari. ¿Naatejaaratej? Seetanujuanaa naara nia jiyateriquiani, canaa quiniuria niarta jiyaniijianucujuhuj, shuquiriaatia pa quiniuria mariyata. ⁹Janiyari cuarta Jesucristo jiyaramiquishanoocua niishiriojoriquiaani, Pueyaso naasucuaari canaa jiyatequiaari juhua najuhua quijiacara, saa puecosocoriquianojua. Canaa naasucuaari naa quiya mijiriani, puetunu pueyajanaa shootianura canaa, Pueyaso seya shootianura canaajuhuj. ¹⁰Canaa tojitiasacari Cristo, canaa naasucuaari niishiyashijiaa quiya tamasacarani. Niajaniyari saniniuujia niishijiaa quiya tamasacara, Jesucristo nia rupesacari. Canaa naasucuaari Pueyaso muerasu sasaca quiya saajani. Niaari saniniuujia Pueyaso muerasu cumueeca quiya tama nia niquiarajaaja. Pueya jiyoteeri nia shuquiritiaa. Canaari saniniuujia saaja rerequetesano quiyani,

pueya soosanojuhuaj. ¹¹Canaari pueyaraaanu miaaquequiaajaani. Canaari jiyamuequiaajaaniuhuj. Canaa cushishano toqueniyojuuari jiyareta sesaruqueniyojua. Pueyari canaa miiquiaa taraatiani. Shaaquiiri canaa tia, canaa rucoojonuucua pueyaracaanu.

¹²Canaari samareequiaani pueyaracaanu canaa poonijosacari tama canaa juaashiquitatajaaja. Pueyari canaa sesacaquiaani. Canaari maninia na riucuaquiaa saajani. Canaa jaara naquiya miishaareni, canaari na rejeretaquiaa juhuajaniya saajani. Majaari canaa naminiu quiquiaa saniniuujia nojori. ¹³Pueya jaara tamasaca niquiara rimiaaquequiaa canaajiniji, canaari nojoritia jeecatoonu saniquiaa juucuanu. Pueyari canaa jiyatequiaa juhua rucucuarani. Canaari naa quiyajaa nojoririani.

¹⁴Naa cua naajiosacari niaacuaratej, majaari cua cararonu paniniu niajaniya. Janiyari saaja nia niishitiojonu pania cutarani. Janiyari nia rootaa juhua cua muerasuniyojuani. ¹⁵Niaa naasucuaari queraatia Jesucristo rupaa niishitiojonaraca. Naajaa, saa janiyajaari juhua nia queni. Nia tojitiasacari Jesucristo rupaa cua pohuatasacari niajaniya, niaari Pueyaso muerasura quiquiaari. ¹⁶Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaj, juhua janiya nia quiniurijuhuj.

¹⁷Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuhaa taa cua niishitiojoquiaacuaa puetunu Pueyaso maapuejanaa puetunu jiyacajiniajanaacuaani. Naa nia rootanutaniyari nia niishiniuhua maninia cua niishitio-

josano niajaniya tarjia. Nojuajaari nia pohuatanutaniyajuhaaj taa quijia cua quiyani cua tojishacari pa Jiyaniijia Jesucristo, naa maninia nia miiniuriajuhuaj.

¹⁸Noojiaqueya niajanijajiniinioori shuquiriaatia quiya, juhua jiyaniijianucua nojori jiyatesacari tama na cuaqueyajaa-ja. Nojoriiri naa miiriqui nojori jiyaniishacari maja naasucuaari cua tacatenu quiniutianihua, cua niqiniuhua niajaniya socua. ¹⁹Janiyacuaajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiaca pueya saniniujiuniutianiyani, cua niishiniuria casaate nojorini, maja naa sacuaaratia nojori quiniuriatej. ¿Cumaacaracate nojori, saaja pocuajaca soj? ²⁰¿Canteeri seetanujuaana Pueyaso pueyanoni? ¿Saaja pocuajatee? ¡Maja pocuaja! Cante Pueyaso Sohuano jiitiaa na cumaquiriquiano Jesucristo na tojiniuriani, cunoori seetanujuaana Pueyaso pueyano cutara. ²¹Nia niishiriojore, cuarta Jesuucua tiuuniaanaa. ¿Taa nia paniya cua miiniuria niajaniya cua quiasacari niaacuani? ¿Niaateeri paniya cua saniitionura niajaniya, jacaria cua niishitiojonura niajaniya cua paniniutia soj? ¿Taa nia paniyani?

Na que niquicuata quijajiniji pohuatasano

5 ¹Niajanijajiniji pohuatasaarucuaa taraatianijia. Tamonu niajanijajinijionaaari jiyanoehua sesa miya. ¡Na que niquicuata quiaquiniaari! ¡Pueyanaa, cuno miishanoori socua jiyanoehua cararaatia Pueyaso niishiyashijiaca miishanojiniji! Pueyaso niishiyashijiaca pueyani, majaari quenaaja nojori naa sesa miiniu niishiniutij. ²Naa cuno pueyano miishacari sesa nia tajiniatej,

¿niaateeri saaja juhujaniya cuniqui na jiitiaaruhua? ¡Niaa cuaara na tacaatiaara! Cuno sesa mijia cuaara taanuusaaria nia tajiniji, maja na cojiniuria socua niajaniya nia rerejosacari. ³Cua tojori taa pa miiniutianiyani. Janiyari maja cua quiniu niaata. Naajaa, coojiaari niaata quiya cua niishiriojosacari niajaniya. Naacuajitij, janiyari juhua nia tajinia quiyani. Naacuajitij, janiyari tari cuno sesa mijia saniniujiurini. ⁴⁻⁵Naaratej pueyanaa, cua tojitiare. Nia rerejore cuno sesa mijia nia tarinitianura Sesaacara. Coojiaari niaata quiniutianiya naa nia miishacari pa Jiyaniijia Jesucristo cumaquishacari niajaniya. Naacuajitij, Sesaacaari naquiya na miiniutianiya; na cusojuanura naasucua, maja soj. Naajaa, na cuaqueyari naa naquiya miishaanuta-niya noojia na tacatonuhua, Pueyaso tojijiaara na quiniuhua. Naacuajitij, pa Jiyaniijia Jesucristo muetasacariuhua pocua, nojuajaari samiitianishaanutaniuhajuhua puetunu Pueyaso muerasutajanaa.

⁶Cuarta Jesuucua tiuuniaanaa, ¿taate nia naata shuquiriaatia quiniu tamajaajani, naa sesa mijia quishacari nia tajiniatej? ¿Majateeri nia niishiniu? ¡Niaa jaara cojiya sesa mijia saniniujiushoojua, socua pueyari mariyata naa sesa miiniutianiyaquij! Sesa mijia niishishanoori tamasacaacua paaquenutaniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashojua miniquootasanojuanaari. Naajuhuaaj, sesa mijia jaara sequeyaquishaare na miishano, sesa na miishanoori socua paaquenutaniya.

⁷Tarjia, Pueyasoori pa supuetanaa Judiocuaca rootaquiaari puetunu na pan poreetejajanaa nojori jatanura puetunu marijiaarajanaa. Nojoriiri naa rootasaaquiaari saaja poreetesoo pan nojori

miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiaari miriquitij, nojori cartenura puetunu sesa nojori miitiushanojuanaa, nojori rupuenura Pueyaso. Naajuhuaq quiarijiani, nia taanuure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuaaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji. ⁸Naa Pueyaso pa cojishacari quiarijiatej, tojetaarucujanaa sesa miyashijiaca pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijanaa, maja sesa miijiacata cojitishano. Seetanujuanaa maninia pa quiri puetunu pajaniyajanaa.

⁹Pueyanaa, janiyari tari niaacuara naajiocanuni cua sequenura nijaniya, maja nia cojiniuria sesoriquia pueya, cuno pojori canapue te na camishoo maaji numuetucuquiaani. ¹⁰Naa cua sequesacari nijaniyatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacuajijanaa rupatenu. Nio jiyacua, pueyari naa sesa miijia quiya: nojoriiri sesa miiquiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panishanoocuaajaaja jiaatiaquiaa puera, maja Pueyasocua. ¹¹Cua tojitiare casaa cua sequecanu tari nijaniyani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji

numuetucuquiaa. Naajuhuaq, majaari nia cojiniu nooj cante casamiriacara quiniucua jiaatiaquiaani. Majaari nia cojiniu nooj cante tama na panishanoocuaajaaja jiaatiaquiaaaniuhuaq, maja Pueyasocua. Majaari nia cojiniu narta pueya sesacaja. Majaari nia cojiniu mashaasequejoja. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja.

¹²⁻¹³Naa cua sequesacari nijaniyatej, majaari cua sequenu quiriquiaa tamasaca pueyajiniji, canapuetucuaja maja Pueyaso muerasuni. ¿Paate nojori nequesoreenaani? Maja. Pueyasocuaajaari nojori saniniujiuniutianiya. Pajaniya cumaati parta Pueyaso pueya saniniujiuquiaani, nojori jaara sesa miiriquia. Naaratej, nia jatare cuno sesa miijia nia tajiniji, noo cante sacuaratia na que niquiocuata quiyacuajani.

Sesa miijia cuaara nequesoreesaaria narta Pueyaso muerasu niquiara

6 ¹¿Seetanutejanaa naa nijaniyajiniji pueya pohuatasanojuhuaq? Niarta Jesucua tiuunia jaara sesa miiri nijaniya, niaanaari Pueyaso niishiyashijiaca nequesoreena tонуquiaa nocuara. ¿Casaara tamajaaja niarta Pueyaso muerasu niquiara nia jeecatoyaquiquiaani? ²¿Niaate niishiyaquia, Pueyaso muerasuuri Pueyaso niishiyashijiaca nequesoreeriquianocuaaja, Pueyaso saniniujiushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarijia niarta Pueyaso muerasu nequesoreenu tamajaaja, nojori jaara sesa miiri shiitianiyojua? ³¿Majate nia niishiniujiuhuaq, paari Pueyaso seya nequesoreeriquianojuhuaq? Pueyaso jaara pa nequesoreetenutaniya

na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? ⁴Niaa jaara nia tapueyocuaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicua? ¡Maja maninia naatej! Cuno pojoriiri maja Pueyaso muerasu jiitianaa. ⁵Naa nia sequeyanijia cua cararonura quenaaja nijaniya, cua niishiriojotenura nijaniyajuhaaj. ¿Seetanujanaa tojetaarucujanaa shaaquti niishijia nijaniyajinijinio, cante na naata nia tonujutoosacari nequesoreenu nijaniya maniniani? ¡Quiya jiyotucuaajaari! ⁶Niajanianaari tama niarta Jesuucua tiuuniaacuarajaaja tonujutojoquiaa Pueyaso niishiyashijiaca nequesoreenaa niquiara. Naa nia miishacaritij, iniaari sesa miiquiaa pueyanaa!

⁷Niaari jiyanhua jiyajeneya nia juayonuujutasacari. Niaa jaara sesa miishaare, niaa cuaara jiyanoootoora saniniuuja, nia casami jaara nohuasesaarejuhuaj. ⁸Niajanियarijataj, iniaari saaja sesa miiquiaacujua! ¡Niaanaari niarta Pueyaso muerasu miiquiaa sesa! Niaanaari tama niarta Jesuucua tiuuniaajaaja nohuasejoquiaa, sesa miijiaca nia quiniuucua.

⁹⁻¹⁰Maja tama nia cuaqueyajaaja nia sapojonu, pueyanaa. ¿Niaateeri niishiya-quiya Pueyasoori maja na rijionu quiniutianiya sesa miijiaca na shuriucua nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapuate na camishoo maajipohua numuetucujuquiaani, naajuhuaaj, noo pojori, canapuate tama na panishanoocuaajaaja jiaatiaquiaani, maja Pueyasooqua. Quejoosaanutaniyajaarihua noo pojori, canapuate narta pueyano niquiocua numuetucujuuani, naajuhuaaj, canapuate maajishuriutia quijia juhua maajitiani. Nohuasenujuacaari

quejoosaanutaniyajuhaaj, noo pojorijiu-huaaj canapuate pueyaracaanu socua casami paniquiaa tama nerajaajani. Mashaasequenujuacaari puetunu quejoosaanutaniyajuhaaj, tamasa sesacajacanio, tamasaacuara rimiaaquejacajuhaaj. Naa quejoosaanuta-niyajaarihua noo pojori, canapuate nohuasejoquiaa na sapojonutani. Puetunu jiyano pueyajanaari maja Pueyaso muerasu na quiniu quiniutianiya, Pueyasota nojori quiniuria shuquiriaatia pueyaracaanu. ¹¹Noojiaqueya nijaniyaji-nijinioori jiyano sesa miijiaca pueya quiquiaari tarijia. Na nuhuaji, sesa nia miishanoori jeequesaaquiaari Jesucristoo-cua nia tiuushacari. Pueyaso Sohuanuuri nioojiajinia tiuquiquiaari, Pueyaso na tojitiniuria nijaniya. Naacuajitij, nia rupuesacari Jesucristo, Pueyasoori nia jiyanooquiaari. Nia sequeereeri: “Niaari saa maninijia quiya cua niquiara”.

Pa cuaqueya cuaara quiiria saa Pueyasoraja

¹²Queraatia pueyari sequequiaa: “Pueyaso jiyanooshacari pajaniya, paari tarinitiasaaree puetunu pa miiniu panishanojuanaa pa miiniuriani”. Seetanujanaa naacuaj. Saniniuuja, majaari puetunu pa miiniu panishanojuanaa maninia na quiniu pajaniyara. Seetanujanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartuusacaritij, na nuhuaji majaari pa naata pa jiitishano casaa pa tarinitianu. ¹³Pueyari sequequiaa: “Pueyasoori miaquesano shipiniquiaari pa seecora. Pa seeco shipiniquiaari sumatuucuaaji saniniuurijia, shuquiriaatia pa quiniuria”. Seetanujanaari cuno sequesano. Naajaa, majaari nio pa niyajetanu, na nuhuaji,

Pueyasoori na shaajanutaniya puetunu-juanaa. ¿Pa cuaqueyariuhua?

¿Pueyasoteeri pa cuaqueya shipiniquiaari pa numuetucunura pa camishoo maajipohua? ¡Maja! Pa cuaqueya cutaraari shipinishaaquiaari pa Jiyaniijia, na panishano pa miiniuria. Naajuhua, pa Jiyaniijia pa cuaqueyara quiyacujua, na cumaquiniuria pajaniya, maninia pa quiniuria pueyaracaanu. ¹⁴Naajuhua, taa Pueyaso samiitianiquiaaricuaa pa Jiyaniijia Jesu na cuaqueyatani, nojuajaa-ri macujiniji naa pa samiitianiniutianihua na cumaacatajuhua.

¹⁵¿Niaateeri niishiyaquiyajuhua, Pueyaso Sohuanu quiniuucua poojiajinia, pa cuaqueyari seetanujuanaa pa Jiyaniijia cuaqueya quiya? Naaratej, Jesucristo cuaqueya pa quishacari, maja cumaati pa curuushojonu pa cuaqueya, maaji paanatu pa numuetucunuta. ¡Cunoori jiyanhua sesa! ¹⁶Pueyasocua-jaari coteenujuanaa na shipinishano pueyano sequequiaari:

“Quia camishacari maaji, niaari niquiriyatu cuaqueyara quiniutia-niya”.

¿Niaateeri nio niishiyaquiya, cante paanatu numuetucureeni, Pueyasora, nojoriiri niquiriyatu cuaqueyaracara quiqui? ¹⁷Naajuhua, paa jaara Jesucristo rupuereni, pa sohuanuuri rupetooree na Sohuanuta, niquiriyatu sohuanuraca pa quiniuria Jesucristota.

¹⁸Naaratej, nioojia nia tacatore maja nia numuetucunura tamasaca, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesoja. Saniniuujia, cante na camishoo maajipohua numuetucujua, nojuaja cutaraari tama na cuaqueyajaaja sesoya. ¹⁹⁻²⁰¿Majateeri nia niishiniu, nia cuaqueyari Pueyaso Sohuanu quiquio? Pueyasoori na Sohuanu jiyaroquiaari

poojiajinia na quiniuria. Pueyasoori nia masequiaari tama nerajaaja nia quiniuria. ¡Jiyanhua naquiya na miiniutia nia masereeri Neyanu na motesacari pocuara! Naacuajitij, Pueyasoori quiarijia pa camarnu quiya. Naaratej, quiarijia maja pa quiniu tama pa cuaqueya camarujuaaja. Naaratej, pa shuquiritiri pa Pueyaso pa cuaqueyata, pa sohuanutajuhua. Nojuacuajaari pa cuaqueya camaru, pa sohuanu camarujuhua.

Pablo rootasano pa caminiuria, camiyojua pa quiniuria soj

7 ¹Quiarijiani pueyanaa, cucuara nia naajosanojinia nia nequesotasano riucureeraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. ²Saniniuujia, quiarijiani, pueyari puera sesa miiniu niishiquiaa. Nocuai pueya cuaara camiiria. Maajipohua cuaara camiirijuhua. ³Pueyano jaara camiri, necocua cuaara na cuaqueya jamueyaquiiira neyaca numuetucunu panishacari. Naajuhua, neyaca cuaara na cuaqueya jamueyaquiiira necocua panishacari na numuetucusaanura. ⁴Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhua, neyacaari maja tama na cuaqueya camarujuaaja na quiniujuhua. Necocuaari neyaca cuaqueya camaru cutara. ⁵Naacuajiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu niajaniya. Naajuhua niajaniya canuunaa, maja nia niquiocua nia tarijionu na panishacari na numuetucusaanura. Saniniuujia, jiyanhua Pueyaso nia secojonu panishacari, jiyacari cutara nia naata tarinitianu numuetucunu rupaquijia, Pueyaso nia secojonura, niaa jaara mariyata naa miiniu paniri. Na nuhuaji

cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujusacari puera. ⁶Nioori quiaririjia maja niaara Pueyaso rootasano janiya. Janiyari nareja naa sequeya niajaninyani socua panaatia nia quiniuria. ⁷Naaratej, nia jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso panyacuajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

⁸Camiojua pueyanaa, mashiquiopue-naa, cua tojitiare: niaa jaara juhuajaniya quiya taa camiojua cua quiyacuaani, niaari maninia quiniutianiya. ⁹Cante saniniuujia maja na naata tama na cuaqueya panishanojuaja rejetenu maninia tamajaajani, cuno cuaara camiriia. Socua maninia cutaraari nia caminiuria, maja maajiicua nia jiaatianura pueyaracaanu. ¹⁰Camiyono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. ¹¹Cante neyaca carteyani, nojori cuaara jiyanoootioora, na rupuetoonuhuara. Jaara maja na naata jiyanoootioonu, cuaara quiiria tamajaaja pueyaracaanu. Cuaara camiyaquiiria socua. Canuunaa, pa Jiyaniijia Jesucristo sequesanoori mariyata niaarajuhua. Naa sequeyari: “Maja nia cartenu nia niquiocua”.

¹²Quiaririjiani, socua nia niishitiojoreeraj. Nioori tama cua niishitiojosanojuaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri, cuaara jiitiaara maninianoj. Quia niquiocua jaara quiata quiniu panyajaa, majaari na cartenu. ¹³Naajuhua, maaji

jaara Pueyaso tojiyashijia niyacaraca quiri, cuaara maninia jiitiaara neyaca. Majaari na cartenu, quia niyaca jaara quiata quiniu panirijia. ¹⁴Cuarta Pueyaso muerasunaa, Pueyaso tojiyashijiaa pueya nia jiyanoori, nojori jaara Jesuucua tiuuniaata caminio quiya. Nojoriiri seetanujuanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, niajaninya cuaara neyaca jiyanooria necocua quiniuucua niarta Pueyaso pueyano. Nareja nia niquirinioj, niaata na rerejonu panishacari. Naajuhua, nia jiyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacaritij, necocua cuaara nareja niquishaariajuhuaj, na rerejosacari niaata. Naajuhua, maja rimiajata nia niquiniu necohua. Necohuari maninia-cuja Pueyasora, maja juhua tama maaji muetusanojuaja. ¹⁵⁻¹⁶Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari niajaninya, niaari juhua camishoo quiriocua. Majaari socua nia tojiniu coteenu nia niyaca, coteenu nia niquiocuanio. ¡Maja cutaraari nia cartenunoj! Nia niishiriojore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhua, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijaaja na cartenura quiajaninya. Naatej, Pueyasoori paniquiaa juhuajaniya pa quiniuria, camishano, cartesano soj.

¹⁷Cuarta Jesuucua tiuuniaanaa, taa nia quiquiaari Pueyaso sequesacari niajaninya

na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiaacuaja puetunu Pueyaso pueya maapuerajanaa-ni. Taa nia quiquiaarini, naajuhuj casaate quia poonijiosano quiquiaarini, cunocujaaari Pueyaso panishano quiquiaari niaara. ¹⁸Naacujajitij, cante tarijia na cararaatiuuquia co mialesano quiquiaari Judio pueyano na quiniuriani, naajaa, cuno pueyano cuaara naa quiri pueyaracaanutej, Jesucristoocua na tiuushacari quiarijia. Naajuhuj, cante mialesoo quiquiaari Pueyaso sequesacari na pueyano na quiniuriani, cuno cuaara quiri naajuhuj. ¹⁹Cante Judio pueyano na quiniuria mialesaaquiarini, naajaa. Cante mialesoo quiyani, naajaa. Saaja maninia cutaraari pa tojtianura Pueyaso niishitiojosano pajaniya. ²⁰Naarate nia sequeyanijia, nia quiri taa nia quiquiaari-cuajani shushajanaa Pueyaso sequesacari na muerasu nia quiniuria. ²¹Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhujaniya nia poonijiore saaja. Saniniuujia, jaara nia naata quiri quia cartesano pueyano nia camarnujiniji, maniniacuajaari. ²²Cante poonitijiotasusano pueyano quiquiaari Pueyaso sequesacari nijaniya na muerasu nia quiniuriani, naajaa, niaari seetanujanaa cartesano pueya quiya pa Jiyaniijia. Naajuhuj, cante camarnuuju quijia quiquiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyaniijia poonitijosano pueya quiya cutara. ²³Pueyasoori jiyanhua naquiya miiquiaari na cusojuasacari Neyanuniyowa, na masenura nijaniya, na muerasu nia quiniuria. Nia masequiaariir tama nerajaaja nia quiniuria. Naaratej, majaari juhua tamonu camarnu poonitijosano

nia quiniu socua. Quiarijia saa Pueyasoraja nia quiri maninia. ²⁴Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiaquishacarijiani, naa nia quiri quiarijia Pueyaso cumaquishacari pueyaracaanu nijaniya.

²⁵Quiarijia nia sequereera cua niishiriojosano, taa camishoo pueya miiniutianiyani. Nioori maja pa Jiyaniijia rootasano janiya. Majaari na sequenu quiquiaari cunojiniji. Naajaa, pa Jiyaniijiaari cucua tiuquuaa na sequenu panishano cua caminiujiuniuria nijaniya, na Sohuanu cumaquishacari janiya. ²⁶Naacujajitij, naa nia sequeyanijia: niaacuajaari niishiya, quiarijiani, jiyanhua puereeta quishacari. Nocujia nijaniya cuaara quiri taa nia quiyacuajani. ²⁷Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaaniu paniniu. ²⁸Naajaa, mashaja jaara camiri, cunoori maja sesa. Naajuhuj, niyacoo jaara camiri, majaari sesa na miishano. Saniniuujia, camishano pueyari socua taraatia miishaanutaniya camishoo pueyajiniji, puereeta quishacari quiniuu-cua mijiria quiarijiani. Majaari cua paniniu taraatia nia miishaanura. Nocujia janiyari naa nia niishitiojiani puera sesa quishacari quiniuuca quiarijiani.

²⁹Cuarta Pueyaso muerasunaa, nijaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jiyanhua pa tojtiane pa Jiyaniijia. Naacujajitij, cante niquiocuaraca quiyani, majaari nocua nia niishiriojonu puera. ³⁰Cante na shaajasanooocua sapueyani, naajaa, majaari na tarinitianu Pueyasora nia poonijionu. Cante queranacuyani,

naajaa, Pueyasora pa poonijiorejuhuaj. Cante casami niquitiojoju quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasocua. ³¹Canapue te niishiiriacani, queraatia casami na masejonura mijiriani, nojori cuaara niishiiria maja casami panijiaa nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

³²Janiyari paniyani mijiria casaacua tacayashijiaa nia quiniuria. Pueyaso nia tojitiare juhuajaniya cutara. Camishoo pueyano na naata saaja pa Jiyaniijiaacua niishiriojonu na tojiniuria maninia, pa Jiyaniijia na shuquiritiniuria. ³³Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria. ³⁴Naacuajitij, noojia niquijioteyari. Naajuhua, camishoo maajiiri pa Jiyaniijiaacua niishiriojoquiaa maninia, tama na cuaqueya na cojuasacarijiaaja Jesucristo- ra, nera na poonijionura puetunu noojiatajanaa. Saniniuuja, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuajitij, majaari puera jeya na quiniu Pueyaso panishano na miiniuria.

³⁵Janiyari naa nia sequeyani socua shuquiriaatia nia quiniuria. Maja cua taajetenu paniniu niajaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniijia nia tojtianura maninia. Níaa jaara cua niishitiojosano tojiri, nia naata pa Jiyaniijia tojinu maninia. Naacuajitij, niaari nioojia niquijioteyaquinutianiya.

³⁶Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiaquiniuria”, cuno pueyano cuaara

miiria taa na miiniu paniyacuajani. Camishocoriquiano maaraja, cuaara camitioora. Quia niyatu jaara camiri, majaari sesa. ³⁷Cante saniniuuja maja noojia niquijioteyaquiya na niishiriojosa- cari neyatuucuaní, cunoori maninia miiniutianiya na camitiyaquishacari, jaara na naata neyatu cojuanu maninia. ³⁸Naacuajitij, cante neyatu camitiriini, maninia miyari. Cante neyatu camitiya- quiyajaaniuhua, nojuajaari socua maninia miya. Naacuajitij, cuno neyatuu- ri na naata Pueyaso panishano miiniu socua, camishoo na quishacari.

³⁹Camishano maaji cuaara carteyaqui- ria neyaca, saminio neyaca quishacarijia. Pueyasoori naa sequequiaaritij. Neyaca jaara cusoyare, na mashiquioori maja tari na quiniu juhua camishano. Na panisha- cari, cuaara camiriia cana na caminiu paniyacuajani. Jaara caminiu paniri, cuaara camiriia Pueyasocua tiuuja pueyanota cutara. ⁴⁰Naajaa, mashiquio jaara camiaquirohua, socua shuquiriaa- tia quiniutianiya, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

¿Maninate cuno shu pa miaquenura, seya jaara puecoosano quiri nareja shipinishano casaacuara, juhua Pueyasocuarajanaa?

8 ¹Cuarta Jesuucua tiuuníaa pueyanaa, janiya quiarijia nia niishitiojonutani- yani teyano pa miaquesanojinijiti puereshiyani. Pueyaso niishiyashijiaacari na miaquesocoriquiano seya puecoonu niishijia shipinishano casaacuara juhua Pueyasocuarara. Pueyari nequesotaquiaa, ¿maninate cuno shu, Pueyaso muerasu miaquesocoriquianojuhuaj, cuno seru jaara taucuaca jyanishano cumaacaraca quijiaacuara mosano quiri? ¡Janiya cutaraari maja cua miaquenunoi! Níaa pohuatareera casaara cua miaqueyaqui-

quiaanoj. Cua tojitiare. Paacuaajaari niishiyani cuno shipinishano casaari nareja pueyano shipinishano najuhuanaj, nojori jiyaniitushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuara puecoosano miaqueriquiani. Naa niishijiaari shuquiriaatia quiya tamajaaja. Saniniuuja, majaari na niishiriojonu narta Pueyaso pueyanooqua. Cante narta pueya paniquiaani, cunoori narta pueyacu niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. ²Naacuaajitij, cante tama na cuaqueyajaaja jiyaniya niishijiani, cunoori juhuanojuaja maja niishijia seetanujuaanaa. ³Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuaana niishijia cutaraari cuno.

⁴Juhuanajuajaari maja cua riuuanu nia niishiniu panishano: “¿Maniniatenaa-ri cuno shu pa miaquenu, seru jaara pueya jiyanishano pueyasooacara mosano quiri?” ¿Casaatejaara cuno nojori jiyanishano pueyasoni? Paacuaajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jiyanishano pueyasoni, cunoori maja seetanujuaana Pueyaso. Niquiriyatu Pueyasoori quiya cutara. Jiyocuacaanu Quijia. Maja socua tamonu quiniu juhua nojuaja. ⁵Tamasaca pueyari jiyaniya queraatia cumaacaraca quijiaaari quiya juhua Pueyaso, jiya cajiniocua, mijiriano. Nojoriiri na jiyatequiaa nojori cojanara, nojori cumaquiriquianojuhuaj. ⁶Naajaa, paari niishiyani saa niquiriyatu Pueyasojuaari quiya. Nojuacuajaari pa Que Pueyaso, pa shipininia. Puetunu casaajanaa shipiniquiaariiri. Pa

shipiniquiaariiri tama nerajaaja pa quiniuria. Niquiriyatujua Jiyaniijiaari quiyajuhua. Cunoori pa Jiyaniijia Jesucristo. Na Queeri na shipinitiquiaari puetunu na shipinishanojuanaa. Pajaniyajuhaaj, paari rishiyani saaja na cumaquishacari pajaniya.

⁷Noojiaqueya Pueyaso pueyari saniniuuja jiyaniyajaa taucuaca shipinijiosano casaari seetanujuaana cumaacaraca quijiaa juhua Pueyasojuhua. Nojoriiri najuhuaana sesa niishiriojonuujuaca. Jiyano pueya jaara Pueyaso muerasura quiri, juhuanojuaja maja na niishiniu maninia. Majaari tarija na niishishano na tarinitianu juhuanojuaja. Naacuaajitij, nojori jaara shu miaquere teyanote mosaaree nojori jiyanishano cumaacaraca quijiaacuarani, nojori miaquenu nuhuaji, noojia niquijitoteyari. Nojoriiri tama sequeyajaaja: “iJaniya naasucuaari sesa miiri! Pueyaso niquiariani!” Naacuaajitij, nojoriiri noojia macuhuajetequiaa. ⁸Pueyanaa, paacuaajaari niishiyani, casaa pa miaquequiaani, naajaa. Pa miaquesanoori maja na naata Pueyaso jiyanoootini pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhuaaj, cante na miaquequiaani, majaari socua sesa pueyanora na quiniujuhuaj. ⁹⁻¹¹Niaacuaajaari jiyanoohua tiuquiquiaa Pueyasooqua. Naacuaajitij, niaa naasucuaari na naata juhuajaniya tiuquiniu cuno shu miaquenura nojori jiyanishano pueyaso quiquiojinia. Niaacuaajaari niishiya, cuno, nojori sequesano pueyasoni, majaari seetanujuaana Pueyaso cuno. Naacuaajitij, nia naata nocuara mosano seru miaquenu juhuajaniya. Saniniuuja, nia cajishacari cuno miaquenujuajinia, niarta Pueyaso pueyanoori nia niquiniutianiya na pueresano shu miaquenuyano. Na niquishacari nijaniya, tamajaaja

sequenutaniyari: “iJaj! iNojoriqui cuno shu miaquenuyacuaa! Saniriirajataj”. Naa sequejatej, nojuajaari jiyaniyajaa cuno miaquesanoori mosaaree seetanu-juanaa tamonu cumaacaraca quijiaacuara. Naacujitij, na sanishacarihua cuno shu miaquenu, tamajaaja noojia macuhujanutaniyari. Naacujitij, niaari niarta Pueyaso pueyano sesoya, na niquiara nia miaquesacari cuno shu. Na niquiniucua niajaniya cuno shu miaquenuyano, nojuajaari cunora na miaquereejuhuj. Saniniuuja, nojuajaari juhuanojuaja maja jiyanoehua Cristooocua tiuuniu na niishiniu. Cristo cutaraari nocuara cusoquiaari, sesa na miishanoiniji na jiyanooshaanura. Niajaniyari saniniuuja quiaririja na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miaquerohuarihua, na rupesacari niajaniya. ¹²Nia miaquesacari, niaari na pueresano shu na miaqueteya. Naacujitij, noojiaari macuhujanutaniya. Naacujitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhuj, naa nia sesosacari tama na pueyanajuaja. ¹³¿Taa nia sequeyani pueyanaa? ¿Maninate shu pa miaquenu, seya jaara taucuaca jiyanishano pueyasocuara puecoosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano mariqui sesereeri cua miishanoiniji. Saaja maninia miijiacara nia jiyateriquiani, taa cua miiquiaa saaja maniniacuaani.

Taa quijia Pablo quiquiaarini, Jesucristo jiyaramiquishano na quishacari

9 ¹Janiya jaara cuno shu miaquenu paniyani, cua naata miaquenu cua panishano. Naajuhuj cua naata puetunu cua panishanojuanaa miiniu taa cua

Jiyaniijia sequequiaari na jiyaramiquishano pueyacuajani. Janiyacuajaari Jesucristo jiyaramiquishanojaaniuhuj. Seetanujanaa cua namijata Jesucristo niquiquiaarinijia. Nojuajaari cua jiyatequiaari na jiyaramiquishano cua quiniuria. Naajuhuj, cua pohuatasacari Jesucristojiniji nia niquiara, niaari na muerasura quiquiaari cua pohuatasanoocua nia tiuushacari. Naacujitij niishishiyari janiyari Jesucristo jiyaramiquishanojaaniuhuj. ²Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesucristo tiuquiaari nia tojishacari cua pohuatasano nojuajiniji. Naacujitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniucua, cua naata miiniujiuhuj taa cuarta Jesu jiyaramiquishano pueya miiquiaacuani.

³Tamonu jaara cua nequesoreere taa cua miiquiaani, janiyari saaja naa na riucuaquiaani: ⁴“Pueyasoori sequequiaari, na jiyaramiquishano pueya cuaara niquitiosaaria na miaquesocoriquiano”. Naaratej, canaa jaara naa miiniu paniriquiani, canaa maara nia sequereni canaa nia niquitiojonura canaa panishano. Naajaa, majaari canaa masenu quiquiaa canaa panishano niajanijajiniji, janiya, Bernabeenio. ⁵Naajuhuj, canaa jaara niquiocuaraca quiriqiani, canaa maara canaa niquiocua rupojoriquia canaacuani, taa cuarta Jesucristo jiyaramiquishano pueya miiquiaacuani. Pa Jiyaniijia Jesu tapueyocuaaari naa miiquiaajuhuj. Pedrojuanaari necocuata rucuanajoquiaajuhuj, Jesucristo rupaa na poojotasacari. Naajaa, majaari naa canaa miiniu quiquiaaquij. ⁶Jesucristoori sequequiaarijuhuaj: “Cua jiyaramiquishano pueya cuaara niquitiosaaria cumaneeca, na panishano nojori maseta-

jara". ¿Niaateeri jiyaniya cuno sequesano maja quiria, maja Bernabeerajuhua? ¡Cunocuajaari naa sequesaaquiaari canaarajuhua! Naaratej, canaa jaara naa paniriquiani, canaa maara canaa panishano masere niajanijajini, canaa niishitiojonuucua niajaniya. Naajaa, canaari tama canaa juaashiquiatatajaa poonijioquiaani, canaa panishano canaa masetajara.

⁷¿Soldadoteeri tamonu poonijosano jiitiaja, na miaquesano na masetajara? ¡Maja! Soldadohua jiyaniijaari na niquitiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¡Maja! Na nuhuaji na natau mianutaniyari na poonijosanojiniji. ¿Majateeri seru juunu camaru ratunu na seru quitiaaca, jaara na paniri? ¡Taaquiririni! Na ratuyacuaaquinatejaj. ¿Maatucua casaara najuhuaana seesaareerini? ¿Canaarijiataj? Canaa jaara naa paniriquiani, canaa naata nia masenu canaa panishano niajanijajini. Naajaa, majaari canaa mashiniquijionu quiquiaa quenaaja canaa panishano niajanijajini. Canaari nareja poonijioquiaa tama canaa juaashiquiatajanijia, Jesucristo rupaa canaa pohuatasacari niajaniya.

⁸Nio cua pohuatasano niajanijani, majaari tama canaa niishirijosanojuanaja. Nio niishitijosanoori tariucuacaanu Pueyaso Rupaa naajiosanojinia quiyajuhua, taa cua sequeriquiaacuajani.

⁹Supuetana Moisés caminiujiushano Pueyasojinijiri naa naajiotasaaquiaariti:

"Maja quia juunu rupaa quia seecutanu maja na miaquenura quia carojotasano, quiaa jaara na rapijioteya na coreetanura".

¿Pueyasoteeri saa juyacaacia niishirioriquiaajaa naa na sequenuratej? ¡Maja!

¹⁰Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na

niishitijosano pueya cuaara nojori niquitiojooara na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiaa? Taaquiririni. Na camaruuri niishiya na poonijosanojiniji mianutaniya na nuhuajiiri. ¿Majateeri pueyano carojotanu shuquiriaatia na nataujuhua? Jaa. Niishiyacuajaari na mianutaniyari.

¹¹Naajaa, niaata cua quishacari, canaari naa poonijioriquiaa Pueyasorani, nioojiaaca canaa cumaquiniuria maninia. Naacuajitij, canaa cuaara niquitiojosaaria saniniuujia canaa panishano. Naajaa, majaari canaa paniniu canaa panishano nia niquitionura canaa. ¹²Tamasaca pueya niishitijosacari niajaniya, niaa cutaraari nojori niquitiojoquiaa nojori panishano. Canaari saniya coteenujuanaa pohuataquiaari Jesucristo rupaa niajanijani. ¿Majateeri coteenu canaa niquitiosaanu canaa panishanojuhuaj? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiitiaaquishacari canaa panishano, canaari sanaa rejeretaja saajani. Majaari canaa taajetenu paniniu quijia niajanijani, canaa jiitiaaquishacari canaa panishano. Canaari naa miiquiaritij, niaa mariqui Jesucristo rupaa tojinu paniyaquiriiri canaa taajetesacari niajanijani, pueyaraaanu canaa mashiniquijosacari canaa panishano niajanijajini.

¹³Niaacuajaari niishiyajuhua, Jerusalén tiajajinia Pueyaso Secojoua tiajajinia, cuarta Judiocuaca miaquesocoriquianoori puecoosaaquiaa Pueyasooacara, taa Pueyaso rootaquiaari canaa supuetanaacuajani. ¿Niaateeri niishiyaquiyajuhua, shu camaruuri secojojuaajinia poonijionaa niquitioquiaa nojori miaquesocoriquianojuhuaj? Naacuajitij, Pueyaso secojojua tiajajinia

poonijionaari miaquesanoraca quiquiaa-juhuaj. ¹⁴Pa Jiyaniijia Jesucristoori na rupaa pohuatanaara naa sequequiaarijiu-huaj: “Cua rupaa pohuatanaa cuaara niquitiojosaaria na panishano pueyara-caanu”. ¹⁵Naacuajitij, cua naata puetunu cua panishanojuanaa sequenu nia niquitiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuaani. Naajaa, majaari cua masenu quijia niajaniya cua panishano cua masetajara. Niaa naasucuaari jiyaniya janiyari quiarijia niaacuara naajioree nioni, cua shiniujiu-niuria niajaniya nia niquitiojonura janiya cua panishano. ¡Maja! Majaari cua paniniu nia niquitionura janiya cua panishano. Janiya jaara titiaare cua miaajenutani, naajaa. Janiyari tama cua juaashiquiatajaaja poonijionu paniyani, Jesucristo rupaa nia tojitianura, cua panishano cua maseyaquiniutia niajanijini. Naacuajitij, janiyari tamajaaja shuquiriaatia quiya Pueyaso niquiarani.

¹⁶Cua tojitianaa jaara niquitiore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua saniitioreeri cua tojiyaquiniuucua nojuaja. Cua pohuatasacari na rupaa, janiyari saaja na tojiyani. Nojuacuajaari cua jiyaroquiaari na rupaa cua pohuatanura. Cunoori maja tama cua niishiriojosano cua miiniurijaja. ¹⁷Majaari cua sequenu quiquiaari cua Jiyaniijia: “Cua Jiyaniijianaa, quia rupaa pohuatareera quiajanijara”. Janiya jaara naa na sequequiaarini, cua Jiyaniijia maara cua niquitiore cua poonijiosanoiniji nera, na shuquiritiasacari janiya. Saniniuujia, tama na panishacarijiaaja cua Jiyaniijiajanaacua-jaari cua jiyaroquiaari na rupaa cua

pohuatanura. Cunora, majaari cua naata na tarijionu. Janiyacuajaari na seruni. ¹⁸Naacuajitij, ¿taa cua miya socuani, cua Jiyaniijia cua shuquiritiniuria socuani? Naa miiquiaacuajanijia, nareja poonijio-quiaanijia tama cua juaashiquiatajaaja cua panishano cua jiitianura, na rupaa cua pohuatasacari. Naaratej, majaari cua sequenu quiquiaa cua tojitianaa, nojori niquitiojonura janiya cua panishano. Jesucristocuaajaari sequequiaari na rupaa pohuatanaa cuaara niquitiosaaria na panishano. Naajaa, majaari naa cua sequenu quiquiaa niajaniya. Naacuajiti cua naata pa Jiyaniijia shuquiritiniu socua, cua pohuatasacari na rupaa cua maseyaquishacari cua panishano cua tojitianaajiniji. Naacuajitij, janiyari shuquiriaatia pohuataquiaa Pueyaso rupaa pa Jiyaniijiarani.

¹⁹Majaari pueya niquitionu quiquiaa janiya na jiitiasanoiniji cua niishitiojonnucua nojori. Naacuajitij, janiyari maja juhua nojori seruni. Pueyanoori maja cua jiyarona. Naajaa, janiyari tama cua cuaqueyajaaja jiyatequiaari juhua puetunu pueya serujuanaa cua quiniuriანი, socua pueya quiniuria pa Jiyaniijia Jesucristo tojitianaara. ²⁰Jesucristo rupaa cua pohuatasacari cuarta Judiocuaca niquiara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriri, janiya jaara juhua tahue quiri nojori niquiarani. Naacuajitij, socua Judiocuacaari Jesucristo rupaa tojitiaa. Jesucristoocua cua tiuushacari, janiyari maja socua cua quiniu juhua cua supuetanaa Judiocuaca rootasano tojijia. Naajaa, na tojiqiaajaa-nijia cua quishacari cuarta Judiocuacata, noo pojoritatej cante cuno rootasano tojitiaajaani. Naacuajitij, cua quishacari juhua nojori, nojoriiri socua cua tojitiaa cua pohuatasacari Jesucristojiniji.

²¹Naajuhua, cua quishacari tamasaca

pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojiyaquiquiaajuhuj, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquiarani. Naajaa, Pueyaso rootasano tojiquiaa pueyaracaanu cutaranijia. Naajuhuj, puetunu Jesucristo niishitijosanojuanaa tojiquiaanijia. ²²Noojiaqueya Pueyaso muerasuuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiquiaajuhuj nojoritia cua quishacari. Nojori jiyaniashacari tamonu casaa sesa quiya, janiyari mariyata maja cua miiniu nojori pueresano casaa. Naacujitij, cua naata nojori cumaquiniu maninia Pueyaso rupaata, nojori tojitiasacari janiya, juhua nojori cua quishacari. ²³Janiyari puetunu naa miiquiaajanaani, socua pueya cua tojitiniuria Jesucristo rupaa. Naa maninia poonijioquiaa cua Jiyaniijiaranijia, cua masenura puetunu maninia na sequesanojuanaa na muerasura.

²⁴Niaacuaajaari niishiya taa pueya tacuarishiyajoquiaacuajani. Pueya netecuatutacari, puetunu pueyajaanari jiyanhua netecuatujua jaarajaaja. Cante narta netecuatunaa shocotajani, shanhua casaa niquitioshiyari. Ritiuuquia pueyanoori jiyanhua shuquiriaatia quijia na shocotanjini na masesacari casaa. Naajuhuj pueyanaa, jiyanhua nia poonijiore Pueyasora mijiria, shuquiriaatia nia masenura nia poonijosanojiniji na jiitiasanojiniji jiyocuacaanu. ²⁵Naajuhuj, pueya jaara tacuarishijionu paniri, cante shocotanu paniyani, cuno pueyanoori puetunu

najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masenano shocotanuucuan, cunoori saaja shanhua nacaque jaamasujiniji shitiasano. Majaari na rishiniu. Pajaniyari saniniuujia pueyaraaanu shuquiriaatia quiniutianiyani Pueyaso niquitiosanota pajaniya, paa jaara maninia miiri mijiria pa quishacari. Naaratej, pa tarinitiare puetunu najuhuana tama pa miiniu panishanojuanaa, pa shuquiritiniuria pa Pueyaso.

²⁶Pueya netecuatutacari, netecuatunaa cuaara niishiiria tee netenu puequeetu quiyani. Majaari najuhuana na camarucuneejonu. Naajuhuj, cua poonijosacari Pueyasora, majaari cua niquijiotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhuj, pa cartere najuhuana pa mijijosano. Saaja pa niishiriojore Pueyasocua, maninia pa tojiniuria nojuaja. ²⁷Janiyari jiyanhua saniniuujia maja cua miiniuria tama cua cuaqueya miiniu panishanojuajani. Janiyari cua cuaqueya jiyartutenu paniquiaani saa Pueyaso cua tojiniuraja. Janiyari tari queraatia pueya niishitiojocuaari Pueyaso rupaa. Janiya jaara tama cua niishitijosanojuaja tojiyaquirini, Pueyaso mariqui cua cartereeri, maja na rupaa cua pohuatanura socua.

**Supuetanaa Israel pueya miishanoori
pajaniyara naajiotasaaquiaari pa
niishiniuria maninia**

10 ¹Cuarta Pueyaso pueyanaa, nia niishiri taa pa supuetanaa Judiocuaca miishaaquiaaricuaani nojori rucuanijosacari pueyaracaanu cariquia jiyajinia. Majaari nia niyajetanu niaa

mariqui Pueyaso tojiyashijiara quiriohua-juhuaj. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhuaj. Pueyasoori puereetuca shoniniacu caminia raquitia-quiaari nojori nuura caminia cajiniocua. Naacujitij, puetunu pueyajanaari niutiaquiaari joojuashiquio. ²Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuca caminia tajiniaaco, cohuaja najaca cariquiaconio. Majaari socua na qitiuniu quiquiaari Egipto pueya seya. ³Puetunu nojorijianaari jiya cajiniocuaji casaa miaquenuujua, Pueyaso tinishano nojori miaquesocoriquiano pueyaracaanu cuno cariquia jiyajinia nojori rucuanajosacari. ⁴Naajuhuaj, nojori jiyamuetusacari, Pueyasoori mohuaca pojuartaniquiaari saajiajiniji. Puetunu pueyajanaari cuno mohuaca ratuquiaari. Pueyasoori cuno saajiajiniji naa raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohuaja, pueyaracaanu nojori na cojuanura. iNojuacuajaari pa Jiyaniijia Cristo quiquiaari! ⁵Puetunu cuno supuetanaa Israel pueyajanaari naa maninia cojuasano quiquiaari cariquia jiyajinia. Naajaa, quera puetunu nojorijianaari Pueyaso tojitiaashijia quiquiaari saaja. Pueyasoori cunora nojori shuquiritiaa quiquiaari. Naaratej nojori cusojuanuuriquiaari cuno cariquia jiyajinia nojori camaruncueetasacari pueyaracaanu, cuaraa puequequiaarijaatijia puetunu cuno tojiyashijiacaanaa.

⁶Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijiniijiri puetunu naajiotasaaquiaarijianaa pajaniyara, pa niishiniuria maja sesa casaacua pa jiaatianurajuhuaj. ⁷Shushajanaa nojori

coteesacari rucuanenu cariquia jiyaco, noojiaqueya nojorijiniinioori caapiqui casaa shipiniquiaari orojiniji juhua juunu niquishano. Nojoriiri tama nojori shipinijiosano casaajaaja sequequiaari: “Nioori pa Pueyasohua, pa mashiquiniaa Egipto jiyajinia pa camarucuaacuaji”. Naacujitij, nojoriiri na shipinishano casaa shuquiritiaquiaari sacuaaraatia. Jiyacari nojori miishanoori naa naajiotasaaquiaariti:

“Pueyari cajitiurii queranacunura. Na nuhuaji, nujuatuquiaariiri na shipinishano juyaca tacho pa jiareyocuatunura. Socua sacuaaraatia casaa miitiquiaariiri”.

iMaja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

⁸Na nuhuaji, tamacari, noojiaqueya nojorijiniinioori sesa miiquiaari taatujuritia, cararaatia taucuaca miishacari nojori shuquirishacari na shipinishano casaa tacho. Pueyasoori nocuaji naa sequequiaari: “iCuaara puecoosaaria cuno sesa miijiaca!” Cunora, veintitrés mil Judiocuacaari puecoosaaquiaari cuno juuca. Cunojiniji pa niishiri maja pa miiniuria sesajuhuaj, taa nojori miiquiaaricuaa taatujuritiani.

⁹Na nuhuaji, noojiaqueya nojorijiniinioori Pueyasota juaaquoquiaari, tamonu miaquesanoocua nojori jiaatiasacari, puera nojori jishacari nojori miaquesano. Nocuaji Pueyasoori sacocua satejoquiaari cuno pueya. Queraatia pueyari cusonuquiaari. Naaratej pueyanaa, maja cumaati pa juaaniu, Pueyaso jaara pa saniniujiuri. Maja naa pa miiniutij paa mariqui Pueyaso juaatiriiri.

¹⁰Tamacari, noojiaqueya cuno pueyajiniinioori Moisésta juayonuutaquiaari. Moisés cuajaari nojori jiitianara Pueyaso jiyatesano quiquiaari. Nocuaji Pueyasoori

mosano casaajuhua? ¿Cojitishiyatee?
iMaja pueyanaa! ²²¿Paateeri pa Jiyaniijia
paraca cojinu paniyani, pa Jiyaniijia pa
juaatiniuriani? ¿Pajaniyate socua
cumueeca pa Jiyaniijiajinijini? ¿Majateeri
nia puerenu pa Jiyaniijia saniitonu?

Taa pa miiniutianiyani

²³Tari sequereecuajaniijia, pa naata
miiniu puetunu pa miiniu panishanojua-
naa. Naajaa, majaari puetunu pa miiniu
panishanojuanaa maninia pajaniyara.
Puetunu pa miiniu panishanojuanaari
maja na cumaquiniu quiniutianiya parta
Pueyaso pueya. ²⁴Naaratej, majaari pa
niishiriojonu saaja maninia pa quiniuria
tamajaaja. Pa niishiriojore parta
pueyacu, maninia nojori quiniuriaju-
hua. ²⁵⁻²⁶Seetanujuanaari nio naajosano:
“Nio jiyari pa Jiyaniijia jiya, puetunu tii
quijia casaajanaano”. Naaratej, niaa
jaara shu masere shu niqitiojosaquiji
cumaneecata, majaari nia nequesotanu:
“¿Nio shujiyo casaacuara mosano?” Maja
naa nia nequesotantej. Nia panishano
nia masere nareja, nia miaquesocoriquia-
no juhuajaniya. Pa Jiyaniijia
shipinishanocuaajaari. Pa miaquesanoori
maja na naata na sesonu pajaniya
Pueyasora.

²⁷Pueyaso niishiyashijia jaara nia
masuure nata nia miaquenura, nia
quiaare, niaa jaara quianu paniri.
Juhuaaniya nia miaquere na rupojosano
niaara. Majaari nia nequesotanunoj:
“¿Nio shuti casaacuara mosaarucuaa?”
Majaari naa nia nequesotanu niaa
mariqui nioojia macuhujetereeri niaa
jaara niishiri nia miaquesanoori
shipinishano casaacuara mosano juhua
Pueyasocuaara. Juhuaaniya nia miaque-
re nareja. Puetunujuanaari pa Jiyaniijia
shipinishanocuaaja. ²⁸Saniniuujia, nia
cojinia jaara numootere niajaniya: “Nio
shuuri mosaaree shipinishano casaacuaa-

ra juhua Pueyasocuaara”, majaari nia
miaquenunoj, niaa jaara naa sequesaa-
re. Maja nia miaquenunoj, nia cojinia
mariqui na miaquerejaariuhua na
cojishacari niajaniya. Nia tarajana
jiyoteeri jiyaniyajaa cuno shipinishano
casaari seetanujuanaa cumaacaraca
quijia. Naacuajitij, na miaquesacari
nocuara mosano shu, noojia macuhua-
nutaniyari. ²⁹Majaari nio cua sequenu
niaara. Niaacuajaari tari niishiya nia
naata cuno shu miaquenu. Nia sequeya
nio cutaranijia nia cojiniaa pueyara, maja
nia miaquenura cuno shu nojori niquiara,
nia cojinia mariqui noojia macuhujaree-
ri cuno shu na miaquesacari niaata.

Niaa naasucuaari cua nequesotanu
paniya: “¿Paatucua pa panishano shu
miaqueyaquirini saaja tamonu pueyano
pueresacari pa miaquenu panishano shu?”
³⁰Paa jaara Pueyaso sequereni ‘paacara-
sho’ cuno sumatuurani, ¿majateeri
maninia pa miaquenura? ¿Tamasacatu-
cua casaara pa sesacare cuno miaquesano
pa miaquesacarini?” ³¹Cua tojitiare
quenaaja cuarta Pueyaso muerasunaa.
Nia miaquesacari, nia ratusacari, casaa
nia miishacarinio, pueyaracaanu puetunu
maninia nia miirijianaa Pueyaso nia
shuquiritiniuria. ³²Puetunu nia miishano-
juanaa cuaara quiiria maninia
Judiocuaca niquiara, taucuaca niquiara-
juhua, parta Pueyaso pueya niquiaranio.
Jiyanohua taraatia cutaraari, pueya jaara
tojiaquiya Pueyaso, juhuajaniya pa
miishacari nojori jiyaniitushano
sacuraatia casaa. ³³Naaratej, janiyari
pueyaracaanu maninia miiniu paniquiaa
puetunu pueya niquiarajanaani, nojori
cuaara tojitiara Pueyaso, Pueyaso
pueyara nojori jiyatesaanura. Majaari
nia niishiriojonu tama cua panishanojuaaja
cua miiniuria. Janiyari socua niishiriojo-
quiaa tamasaacuani, maninia cua
miiniuria nojori niquiara.

11 ¹Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuaani, juhua nojuaja cua quiniuria. Mijiria na quishacari, nojuacuaajaari pueyaracaanu maninia miiquiaari pueyacuaa.

Maajipohuatucua taa quiriquiani Pueyaso pueya rerejosacari

²Cuarta Jesuucua tiuuniaanaa, janiyari nia shuquiritiaani, pueyaracaanu nia niishishacari janiya, naajuhuj, maninia nia tojitiasacari puetunu cua niishitiojo-sanojuanaa Pueyasojiniji. ³Janiyari paniya cutarani socua nio nia niishiniuria: Cristocuaajaari caya camarnu. Cayari saniniuuja necocua camarnu, taa pa Que Pueyaso pa Jiyaniijia Cristo camarnu quiyacuaani. ⁴⁻⁵Naaratej, nia secojosacari Pueyaso, nia caminiujiushacari Pueyaso sequenu panishano Pueyaso pueya maanu niquiarajuhuj, jiyacaritij, canuu cuaara jocuaara na nacaque na pocuasacari. Saniniuuja, maajipohua pocuanura, nojori cuaara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhuj, na naca mishiquiosano. Cararaatiajaariuhuj, maaji pocuasacari Pueyasota, Pueyasorano, na naca mishiquiosoo. Maaji jaara caririquiyashijia quiri, ¿casaara na naca na tuqueteyaquiya puetunujuaanaacuaraarini? ¿Maajiti juhua cayara quiniu paniya? Maja naasucua. ⁶Maaji jaara na naca mishiquionu paniyaquiri pueya niquiara na pocuanura Pueyasora, Pueyaso na secojonurano, cuno tojiyashijia cuaara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiriirini. Cararaatia quiyajaa-riuhuj, na secojosacari Pueyaso, na caminiujiushacari Pueyaso sequenu panishano pueya niquiarajuhuj,

mishiquiosoo na naca quishacari. ⁷Maajiri neyaca shuquiritiya na tojijia na quishacari. Naacujitij, neyacaari narta pueya shuquiritiasano quiyajuhuj. Naaratej, maaji cuaara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnura na quiniurijuhuj. Cayari Pueyaso shuquiritiya Pueyaso tojijia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuj.

⁸Pueyaso jaara coteenujuanaa caya shipiniquiaari, majaari maajijiniji na shipininiu quiquiaari caya. Maaji cutaraari caya riuquiocujajiniji shipinishaaquiaari. ⁹Naacujitij, maajiiri cayara shipinishaaquiaari. Majaari caya shipinishaanu quiquiaari maajiria. Naaratej, maaji cuaara caya tojiiria cutara. ¹⁰Naacujitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuaara mishiquioora na naca. Naacujitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaa-riuhuj. ¹¹Naajaa, puetunu pajaniyajanaari mariyata Pueyaso muerasuni, Jesucristoocua pa tiuushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueni cayaju. Naajuhuj, cayari maja na naata supueni tamajaaja maajijiu. ¹²Seetanujuaanaari, maajiiri coteenu shipinishaaquiaari caya cuaqueyajiniji. Na nuhuaji, puetunu canuujuanaari saniniuuja supuequiaa maajijiniji. Naajaa, puetunu pajaniyajanaari Pueyasojiniji supuequiaani.

Naacuaajitij, caya, maajinio, nojoriiri mariyata panishano pa naacutoojonura.

¹³¿Taa nia sequeyani pueyanaa? ¿Maninateeri, maaji jaara Pueyaso secojore na naca mishiquiosoo pueya niquiara? Maja maninia. ¹⁴Naajuhuaaj, quera puetunu pueyajanaari sequeja, cararaatia niquishanoori caya jaara tucumuejaru quiya juhua maaji. ¹⁵¿Maa-jirijiataj? Jaara tucumuejaru quiri, cunoori maninia niquishano cutara. Pueyasoori naa maninia shipiniquiaari maaji, tucumuejaru na quiniuria, na naca mishiquioriquiano na mucacata. ¹⁶Tamonu jaara nacoonu paniyajaa socua pa muesujiniji, niocua na sequire: “Pablocuajaari tari pa niishitiojoree puetunu na niishishanojuanaa. Naajuhuaaj, puetunu Pueyaso pueya maapuejanaari tamaquiicua naa miiquiaa taa Pablo pohuataree pajaniyacuaajani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

Corinto pueyari sesa miiquiaari na miaquenuujuaajinia, pa Jiyaniijia cusonu nojori niishishacari

¹⁷Cuarta Jesuucua tiuuniaanaa, nio, janiya niaacuara na naajiyani, nioori maja cua shuqiritianura niajaniya. Nia rerejosacari pa Jiyaniijia cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniuuja, niaari saaja socua seseyaree. ¹⁸Janiyari naa pohuataaarucuaa niajanijajinijini: “Corinto pueyari sesa na niishiriojonuta nojori jiuujiajinia raquirijitiaquiaa nojori rerejosacari”. ¿Seetanutejanaa nio pohuatasano niajanijajiniji? Naa naasucuaaj. ¿Casaate cua toyani? ¹⁹⁻²⁰Seetanu naasucuaajanaa niaari nioojiajinia naa niyaquejoquiaa-quij. Paacuaajaari tari niishiquiaarini

noojiaqueya pueyari Pueyaso pueya maapuecuajij rupatenutaniya. Naa niishishanote canaputee maja Pueyaso muerasuni. Cante seetanujuaana Pueyasooocua tiuujiani, majaari na rupatenu quiniutianiya narta Pueyaso muerasuucuaaji. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusonu nia niishiniuria, maja sesa nia niishiriojonu juhua niyaquejono nia quiniuria. Niaa jaara naa niyaquejoriquiatej, majaari pa Jiyaniijia cusonu nia niishiniu quiquiaa seetanujuaana. ²¹Niajanijanaari tama nia patasanojuaja coteetaquiaa miaquenu. Niaanaari nia miaquesano serotaacquiquiaa. Naacuaajitij, casamiijiuniucuaanaari miaajecoquiaacujua. ¡Saniniuuja casamiriacanaari juhuajaniya mashaasequenuquiaacujua! ²²¡Jiyanohua cararaatiaari naa nia miishanotej! Niaa jaara naa jamuejaca quiriquiatej, ¿majate nia naata tama nia tiajiniajaaja nia miaquenuunu, ratununio? ¿Niaateeri niarta Pueyaso muerasu sooquiaa? Naa nia miishacari casamiijiuniucuatej, niaacuajaari nojori cararoquiaa, casamiijiuniucua nojori quiniucua. ¿Taa nia sequeyani pueyanaa? ¿Janiyate nia maniniuhuaqueetaani? ¡Maja! Jiyanohua tacayanijia. Majaari cunora cua shuquiritanu niajanijia.

Pa Jiyaniijia rootasano na cusonu pa niishiniuria

²³Janiyacuaajaari nia rootacanu tari pa Jiyaniijia Jesu pohuatasano janiyani, taa na miaquequiaari na saquiriojosano pueyatani. Cuno niucuaaja, Judasri pa Jiyaniijia quateriquiano quiriquiaa taucuaa mosocoriquiano. Cua tojitiaro-huacuara pueyanaa. ²⁴Judas quiateyaquishacarijia nojuaja, pa Jiyaniijia Jesucristoori pan riquiaari. Na

Que Pueyaso sequereeri: “Paacarasho cua Quenaa”. Na nuhuaji, na neecaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyara-caanutej, nia niishiniuria cua miishano niaacuara”.

²⁵Naajuhuaj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secjoreeri. Na nuhuaji, na pueya sequerohuari: “Pueyaracaanu nia ratusacari nio, nia niishiriquia, cua Queeri cua nanaca seera nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani”. Pa Jiyaniijiaari naa sequequiaari. ²⁶Naa nia miaquesacaritij, nia ratusacarijuhuaj, pueyari niishiniutaniya niaari Pueyaso jiyanooshano pueya, pa Jiyaniijia Jesu cusunucua pa niti. Naa nia miaqueriquia pueyaracaanu na sequesano pan, pa Jiyaniijia cuaara tiuquiriohuajaatijia.

Nia niishiri taate pa naata miaquenu pa Jiyaniijia cusunu pa niishiniuriani

²⁷Naaratej, niaa jaara sesa miiri, Pueyaso nia secjore ritia na jiyanooniuhua niajaniya, nia miaquenuhuara pa Jiyaniijia cusunu nia niishiniuria. Niaa jaara pa Jiyaniijia pan miaquere jiyanooshoo nia quishacarijia, niaa jaara na cusunu mashaca rature jiyanooshoo nia quishacarijuhuaj, iniaari na cusunu rerequeteya! Niaari juhua sequeyaruhua, pa Jiyaniijia najuhua cusoquiaari. Naa nia miishacaritij, niaa cutaraari saniitosaanutaniya.

²⁸Naaratej, tama nioojiajiniajaaja nia niishiriojore taa nia quiquiaani, casaa nia miiquianu sesani. Naa nia miiri coteenu, niaa mariqui sesa nia miishano miaqueta-reeri Pueyaso jiyanoaquishacarijia

niajaniya. Naa nia miiniu nuhuajitij, niocua shuquiriaatia juhuajaniya miaquerohua pa Jiyaniijia pan. Niocua juhuajaniya raturohua pa Jiyaniijia raatonuquejiniji cutara. ²⁹Cante juhuajaniya miaquereeni, cante juhuajaniya raturee najuhuanani, jiyanooshoo na quishacarijia, cuno pueyanoori Pueyaso saniitiotenutaniya tama na cuaqueyajaaja. ³⁰Naacuajitij, jiyanooshoo nia quishacarijia nia miaquesacari, queraatia niajaniyajinijinioori cunora cusosuhua quiya. Noojiaqueya niajaniyajinijinio cutaraari tari cusunucanujuhua, Pueyaso saniitosacari nojori. ³¹Nocuaijia tama nia cuaqueyajaaja nia jeecare suraatia, pa Jiyaniijia mariqui saniniuuja nia saniitioreeri. ³²Pa Jiyaniijia jaara pa saniniujiuri, canapute sesa quiyani, Pueyasoori na saniitoquiaa na muerasu nojori quiniucua, maninia nojori quiniuhua juhua maninia na muerasu. Naacuajitij, juhuacarijia na saniitosacari na muerasu, majaari pa saniitosaanu quiniutaniya na ruuretajacata jiya puequesacari, Pueyaso jaqueroosacari na tojiyashijia.

³³Naaratej cuarta Jesuucua tiuninaa-naa, niaa jaara pa Jiyaniijia pan sanu paniriquia na cusunu niishiniuria, nia sashiri niarta Pueyaso muerasu, jatiqui nia miaquenura maninia. ³⁴Miaajeyano maaraja, cuaara miaqueera coteenu tama na tiajiniajaaja, Pueyaso mariqui nia saniitioreeri, sesa nia miiniucua nia rerejosacari nia jamenua.

Socua nia nequesotasanojiniji janiya, janiyari nia sequenutaniyani na tiuquishacari niaacua.

Pueyaso Sohuanu cumaquishacari puetunu Pueyaso muerasujuaana

12 ¹Cuarta Pueyaso muerasunaa, niaacuajaari tari niishiya Pueyasoori na Sohuanu niqutioquiaa puetunu

pajaniyajanaa, na cumaaca pa jiitianura. Quiarijiani, socua nia niishitiojonu paniya cunojinijini. ²Niaacuaajari niishiya taa nia quiquiaari tarini, Pueyaso niishiyashijiaca nia quishacarijia. Niaari puetunu sapojosaaquiaarijanaa, pueya shipinishanoocua nia tiuuniuucua najuhuanaj. Sesaacaari naa nia tojitiquiaari najuhuaa pueya shipinishano, nia jiyanishano pueyasohuani. ³Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujuanaa Pueyaso Sohuanu cumaacata pohuataa Pueyasojinijini? Naa nia saniniujuritij: Pueyaso Sohuanu pohuatesacari pueyano, nojuajaari maja na naata Jesucristo sesacanu. Naajuhua, saaja Pueyaso Sohuanu cumaquishacari pueyano na naata sequenu: “Jesucuaajari Jiyaniijiajanaa”. Naacuaajitij, maja nia tojinu na rupaa, cante Jesucristo sesacajani.

⁴Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasujanaa cumaquiquiaa tamaatia miishano pa miiniuria na cumaacata. ⁵Queraatia tamaatia poonijiosanoori Pueyasora quiya. Naajaa, puetunu pajaniyajanaari niquiriyatujua Jiyaniijia poonijioquiaani. ⁶Puetunu pajaniyajanaari tamaatia miiquiaa pa poonijiosanoni. Saniniujia, Pueyasojanaa na panishano miiquiaa puetunu pueya jiuujiajiniajanaa. ⁷Pueyasoori puetunu na muerasujanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujuanaa. ⁸Pueyasoori pa cumaquiquiaa tamaatia miishano pa miiniuria. Naacuaajitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. ⁹Pueyaso

Sohuanuuri tamonu cumaquiquiaa Pueyasooocua na tiuuniuria jiyanohua, na shiniujiniuria Pueyaso miiniu panishano pa miiniuria. Pueyaso Sohuanuuri tamonu cumaquiquiaajuhua cusosuhua na naatanijionura Pueyaso cumaacata. ¹⁰Pueyaso Sohuanuuri tamonu pueyano jiyajeneta miishano miitiyajuhua jiyajeneta miishano miitiyajuhua Pueyaso cumaacata. Tamonuuri niishitishaaquiaa Pueyaso sequenu panishano na pohuatanura pueya niquiara. Pueyaso Sohuanuuri tamonu niishitiquiaa teyano sohuanute tamonu pueyano cumaquiyani, Pueyaso Sohuanuuri, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanuuri tamonu pueyano niishitioquiaa tamaatia rupaajinia sequesano na pacunura pueya rupaajiniajuhuaj, pueya tojiniuria maninia tama nojori rupaajiniajaaja. ¹¹Naacuaajitij, Pueyaso Sohuanuunaari puetunu pa cumaquiquiaajanaa, tamaatia pa miiniuria. Naa pa poonitijioquiaari taa na paniyacuajani, cana na panijajaaniuhua.

Puetunu Pueyaso pueyajanaari juhua niquiriyatu cuaqueya quiya

¹²Tamaatia poonijiosano puetunu pajaniyajanaa jiitiasacari, paari juhua niquiriyatu cuaqueya quiyani. Mijiria pa cuaqueyari jiyanohua maninia shipinishano jiyanohua Pueyaso niishitiajata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhua. Naacuaajitij, Cristota rupetootesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijia pa

poonijionura jatiqui. ¹³Pueyasoori pa rupuetootequiaa na Sohuanuta, puetunu jatiqui pa quiniurijanaa. Pueyasoori puetunu na muerasujuanaa samiitiani-quiaari na Sohuanuta. Pueyaso Sohuanu pa jiitiasacari, puetunu pajaniyajanaari rupuetootesano quiya niquiriyatu Sohuanutani. Naacujitij, paari juhua niquiriyatu cuaqueya quiyani: Judiocua-ca, taucacanio, poonitijosano pueyajuhua, camarnuuju pueyano.

¹⁴Pa cuaqueyajiniji pohuatareeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. ¹⁵¿Taa nia sequeyani pueyanaa? Pa niohuaca jaara sequere: “Janiyari maja juaashiquiani. Naaratej, janiyari maja pueyano cuaqueyajiniji”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Najuhua, majaari pa soonu tamaatia poonijosano pa jiitiasacari Pueyasora. ¹⁶Naajuhua, pa numaa jaara sequere: “Janiyari maja namijiani. Naaratej, janiyari maja pueyano cuaqueyajiniji”. ¿Taa nia sequeyani pueyanaa? ¿Pa numaate maja pa cuaqueyajiniji, maja namijia na quishacari? ¿Sooshiyatee? Maja. ¹⁷Paa jaara saaja puereetuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

¹⁸Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupuetootesaaquiaari tee Pueyaso paniquiaari nianucujani. Naajuhua, Pueyasoori puetunu na muerasujuanaa cumaquiquiaa mariyata, tamaatia poonijosano pa jiitianura taa na paniyacujani. ¹⁹Pa cuaqueya jaara quiriquia saa namijiaja puetunujuanaa,

¿pa cuaqueyatuma tee quiriquia socuani? ²⁰Puetunu pa cuaqueya casaajanaari namitia saaja niquiriyatu cuaqueya quiya.

²¹¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhua quijiaca. Maja nia naata niquiniu”, ¿majate pa juaashiquia pa panishanoju-hua? Taaquiriirini. Naajuhua, pa naca jaara pa niohuaca sequere: “Niohuacanaa, niaari najuhua quijiaca. Maja cua paniniu niya niajaniya”, ¿majate pa niohuaca pa panishanojuhua pa rucuan-jotajara? Taaquiriirini. Pueyanaa, naa pa quiri jatiquijuhua puetunu parta Pueyaso muerasutajanaa, taa puetunu pa cuaqueyajinia pa jiitiasano casaajanaa quiya jatiquicuaani. Naaratej, puetunu parta Pueyaso muerasujanaari pa panishano quiya, pa cumaquitioonura maninia.

²²Teyano casaate pa cuaqueyajinia socua sasaca quiya pa niquiarani, cunoori socua pa panishano. Maja pa naata rishiniu cunooju. ²³Naajuhua, teyanote maja puera maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririquija cutarani, juhua su pa quishacari. ²⁴Saniniuujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niquishano pa cuaqueyajiniani. ²⁵Naacujitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniurijanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhua. ²⁶Pa niohuaca jaara noore, puetunu pa

cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujanaa shuquiriaatia quiriohua. Naajuhuaaj, parta Pueyaso muerasu jaara taaatia miishaare, naa nojori pa taraajetarejuhuaj. Naajuhuaaj, parta Pueyaso muerasu jaara maninia miishaare, nojoritia pa timirijuhuaaj.

²⁷Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. ²⁸Cristo cuaqueya pa quishacari, Pueyasoori coteenujanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujuniuria Pueyaso sequenu panishano pueya niquirajuhuaaj. Naajuhuaaj, Pueyasoori tamasaca jiyatequiaari na rupaa niishitiojonaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasaacari jiyatesaaquiaari cusosuhua naatanijionaa nojori quiniurajuhuaaj, Pueyaso Sohuanu cumaquishacari nojori. Tamasacaari jiyatesaaquiaarijuhuaj Pueyaso muerasu naacunaara nojori quiniuria. Tamasacaari jiyatesaaquiaarijuhuaj Pueyaso muerasu jiitianaa nojori quiniuria. Tamasacaari pohuatesaaquiaari tamaatia rupaacajuhuaaj. Naacujitij, queraatia tamaatia poonijosanoori quiya. ²⁹¿Puetunu Pueyaso muerasujanaateeri jiyaramiquishaaquiaari Jesucristojiniji nojori pohuatunura tamasaca niqiara? Maja. ¿Puetunu Pueyaso muerasujanaateeri Pueyaso rupaa pohuatanaa? Maja. ¿Puetunu Pueyaso muerasujanaateeri Pueyaso rupaa niishitiojonaa? Maja. ¿Puetunu Pueyaso muerasujanaateeri

jiyajeneta miishano miijiaca? Maja.

³⁰¿Puetunu Pueyaso muerasujanaateeri cusosuhua naatanijionaa? Maja.

¿Puetunu Pueyaso muerasujanaateeri tamaatia rupaaca pocujaca? Maja.

Tamaatia rupaajinia pohuatasano jaara quiriquia, ¿puetunu Pueyaso muerasujanaateeri na naata na pacunu tama nojori rupaaajiniaaja? Maja. ³¹Naaratej, nijaniya cuara jiaatiaara socua maninia poonijosano nia jiitianura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesuucua tiuuniaanaa, quiarijiniani nia niishitiojoreera casaate socua panishanoni, Pueyaso shuquiritianura pajaniya.

Panijiaca pa quirij

13 ¹Pueyaso Sohuanu jaara cua pohuatere queraatia cua niishishoo rupaaca, Pueyaso seya rupaajuhuaaj, naajaa, janiya jaara pueya paniyashijia quirini, janiya maara saaja cojutuneja quiri Pueyasorani. ²Naajuhuaaj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniaquishacari pueya, janiya maara najuhuana quijia quirini. Naajuhuaaj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuana quijia quiri Pueyasorani. Naajuhuaaj, janiya jaara Pueyaso cumaacaraca quirini, tuhananuhua cua jatanura tamocora Pueyasoocua cua tiuuniucua jiyanojuani, naajaa. Cua paniaquishacari pueya, janiya maara najuhuana quijia quiriquia Pueyasorani. ³Naajuhuaaj, janiya jaara puetunu cua casamijianaa nareja niqitiore casamijiuniucua cua paniaquiniutiani, cua Jiyaniijia maara cua shuquiritiaaquiri.

Naajuhuj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyanijia maara cua shuquiritiaaquiri, janiya jaara pueya paniyashijia quirini. Naajuhuj, janiya jaara mosaare Pueyaso rupaa cua pohuatanuucuan, naajaa, cua Jiyanijia maara cua shuquiritiaaquiri, janiya jaara pueya paniyashijia quirini.

⁴Cante pueya panijiani, nojuajaari panaatia sashijia. Cante pueya panijiani, nojuajaari maninia mijia puetunu pueyarajanaa. Cante pueya panijiani, nojuajaari tamonu pueya jiitiasanoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuj, cante pueya panijiani, majaari pueya rerequeteja na quiniu. ⁵Cante pueya panijiani, majaari pueya na cararajonu. Cante pueya panijiani, majaari saaja nera niishiriojua tamajaa. Cante pueya panijiani, majaari ritia juajia. Majaari na niishiniu naminujuhuaj, tamonu jaara sesa na miiri. ⁶Cante pueya panijiani, nojuajaari pueyacua taraajeja, nojori miishacari sesa. Saniniuujia, nojuajaari shuquiritiaa quiya pueya miishacari Pueyaso panishano. ⁷Cante pueya panijiani, juhuajaniya pueyaracaanu rejeretaari, tamasaca miishacari sesa nojuaja. Majaari na taacanuunu Pueyaso sequesanojiniji, tamonu sequesanojininio. Naajuhuj, majaari na tarinitianu maninia miiniu pueyaracaanu. Pueya panijiaari naa puetunu rejeretajanaa, taraatia na miishacari.

⁸Panijia pa quiniuni, cunoori pueyacaanu panishaanutaniya, maja saa mijiria pa quishacarijia. Naaratej, socua cutara panijia pa quirii. Mijiria pa quishacari, Pueyaso Sohuanuuri pa cumaquia Pueyaso sequenu panishano pa caminiujiuniuria, pa niishishoo rupaaca pa

pocuanurajuhuj, Pueyaso niishitishano pajaniya pa pohuatanurano. Puetunu nio niishishanojuanaari puequenutaniya Jesucristo tiuquishacariuhua pocua.

Paniniu cutaraari puequeyaquiniutianiya. ⁹Mijiria pa quishacari, paari saaja shiitianiyojua Pueyaso niishishano jiitiaani. Pa niishishano Pueyasojiniji pa pohuatasanon, cunoori saaja shiitianiyojua Pueyaso niishishanojiniji.

¹⁰Naacujitij, mijiria pa niishishanoori najuhua quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyaajanaa.

¹¹Janiya jaara naatujua quiquiaarini, juhua naatujua pocuaquiarinijia. Juhua naatujua niishiriojoquiarinijia. Saaja naatujua niishitija jiitiaquiarinijia. Saniniuujia, janiya jaara cumantumaca quiquiaarini, janiyari cua naatujua quiniu niyajetaquiarini. Naajuhuj mijiria pa quishacari, paari juhua naatujoori quiyajaa Pueyaso niquiarani. Pa Jiyanijia tiuquishacariuhua, paa cutaraari cumueeca Pueyaso pueya quiniutianiya.

¹²Mijiria pa quishacarijia, paari shiitianiyojua niishiyani. Paari juhua ninitia niquiya jariyani, juhua sesarunee niquitijinia. Pueyaso shuriucua pa quishacari, paari maatia niishiniutianiya. Quiarijin, saa shiitianiyojuajaari pa niishishano. Na nuhuaji, Pueyasota pa quishacari, paari puetunu maninijanaa niishiniutianiya, naatej, taa Pueyaso niishiya puetunu pajaniyajanaacuaani. ¹³Quiarijin, paari Pueyaso rupaacua tiuuni niishiyani. Naajuhuj, paari juhuajaniya sashiniu niishiyani, maatia pa niishishacari nojuajaari maninia miniutianiya pajaniya. Nioori maniniacua. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajinijiniojuanaa.

**Niishishoo rupaaca pocuanujiniji
niishitiojosano**

14 ¹Naarate cua panishano Pueyaso muerasunaa, nia jiaatiare socua jiyanoehua pueya panijiaca nia quiniuria, Pueyaso panijiaca juhuaj. Naajuahuaj, nia jiaatiare Pueyaso Sohuanu cumaaca nia jiitianura maninia nia miiniuria. Panishano cutaraari Pueyaso Sohuanu niishitija nia jiitianura, Pueyaso sequenu panishano nia caminiujiuniuria Pueyaso pueyara. ²Cante niishishoo rupaa pocuaa pueya niquiara Pueyaso Sohuanu cumaacatani, cuno pueyanoori maja na cumaquiniu narta Pueyaso pueya. Na pohuatasanoori saaja Pueyaso tojishano, maja pueya tojishano. Cuno pueyanoori jiyasohuaja Pueyaso Sohuanu niishitishano pohuataa pueya niquiara najuhuanaj. Majaari pueya niishiniu casaa na sequeyani. ³Saniniuujia, cante Pueyaso sequenu panishano caminiujiujia pueya rupaajiniani, cunoori narta Pueyaso muerasu cumaquiya. Na numooteyari. Na cumanijiajaariuhuaj. ⁴Na pohuatasanoori maja najuhuaana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuaana pocuaari. Saa tama noojia cumaquiyaajaarijia. ⁵Puetunu niajanijajanaa jaara niishishoo rupaaca pocuanu niishijiaca quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu niajanijajanaa jaara Pueyaso sequenu panishano caminiujiuninaa quiriquia Pueyaso cumaacata. Cante Pueyaso rupaa pohuatanani, cuno pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuanaari mariyata panishano quiya, na sequesano jaara

pueya rupaajinia pacusaare pueya tojishocoriquiano. Naacuajitij, Pueyaso maapueeri cumaquishaanutaniyajuhuaj, maatia Pueyaso sequesano nojori tojishacari.

⁶Cuarta Pueyaso muerasunaa, ¿niaatu-cua taa sequereni, janiya jaara Pueyaso rupaa pohuatasee niajaniya nia niishishoo rupaajiniani? ¿Niaatucua cumaquishaare cua pocuasacari najuhuaana naa nia niquiarate? Maja. Niaa cutaraari cumaquishano quiniutianiya, janiya jaara nia pohuatare nia rupaajinijanaa Pueyaso niishitiojosano janiyani. Maniniajaariuhuaj janiya jaara nia niishitiojore Pueyaso rupaa nia rupaajiniani. ⁷Nia niishiriojore. Jiuujiaaju casamiiri rupaaracajuahuaj. Naaratej, paari shuquiriaatia tojitiaa naajua jonesesarini, jaaquequejotaja taquinio-sacarijuhuaj. Saniniuujia, pueyano jaara naajua jonenejonu saniniujiya na niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishiniu casaa na jonenenu paniya juucuan. ⁸Naajuahuaj, trompeta jaara sesa jonenesaare, ¿soldadohuate na naata niishiniu casaa na miiniutianiya? Maja. ⁹Mariyata naajaariuhuaj, niaa jaara niishishoo rupaa pocuaa pueya niquiara, ¿pueyatu-cua taa niishirini casaa nia sequeyani? Niaari saaja nia niti taquiriocuateya najuhuaana nojori niquiara. ¹⁰Niaacuajaari niishiya queraatia rupaacaari mijiria quiya. Puetunu maninijanaa cutaraari na niishiniaara. ¹¹Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuanaari tahue quiya quiriajuhuaj. ¹²Cuarta Jesuucua tiuuniaanaa, niaacuajaari Pueyaso Sohuanuucua jiaatiaquiaa, na cumaaca nia jiitianura. Maniniacuaja. Naajaa, niajaniya cuaara jiaatiaara

Pueyaso Sohuanu cumaquiniuria niajaniya, puetunu tamaatia poonijiosa-nojuanaa nia miiniurijahuaj, maja saaja tamaatia rupaacajinia nia pocuanura. Naacujitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari niajaniya.

¹³Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuaara secojora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajiniajuhuaj. ¹⁴Pa secojosacari Pueyaso pa niishishoo rupaajinia, Pueyaso Sohuanuuri pa sohuanu secojoteya Pueyaso. Majaari pa niishitiaja niishiniu cutara casaa pa sequeyani. ¹⁵Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuaara secojora Pueyaso pa niishishoo rupaajinia. Pueyaso pa secojorejuhua tama pa rupaajiniajaaja. Saajuhuj, pa sohuanu cuaara jaaquequejora Pueyaso niquiara pa niishishoo rupaajinia. Pa jaaquequejorejuhua tama pa rupaajiniajaaja. ¹⁶Pueyaso Sohuanu jaara nia sohuanu secojotere niishishoo rupaajinia, nia tojitianaari maja na naata sequenu: “Jaa, cuaara naa quiiriatej”. Majaari nojori niishiniu tamaatia rupaajinia nia secojosano. ¹⁷Niaa naasucuaari jiyanoehua maninia secojiya Pueyaso. Naajaa, saaja najuhuaa quiyari tamasacara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaca. ¹⁸Pueyanaa, shuquiriaatia quiyaniija Pueyaso niquiara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaja socua niajanijajiniji cutarani. ¹⁹Naajaa, janiya jaara pueyaracaanu pocuariquia

niishishoo rupaajinia Pueyaso pueya maapue niquiarani, cuno maara najuhua-na quiriquiaj. Rupaquijia pohuatasano tama pueya rupaajiniajaajani, cunoori jiyanoehua socua maninia tucuyocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

²⁰Cuarta Pueyaso muerasunaa, niaari najuhuaa shuquiriya niishishoo rupaajinia nia pocuasacari pueya niquiara, naatej, taa naatujoori shuquiritiaquiaa quiarinio tacuarishijiotajacuaani. Niaa jaara juhua naatujoori quiniu panijajaa, sesa niishiriojiyashijiaca nia quiri, taa naatujoori quiyacuaani. Saniniuuja, majaari seetanujanaa naatujoori niajaniya. Naaratej, cumantumaca nia quishacari, nia niishiriojore maninia nia cumaquitioonura nia rerejosacari.

²¹Tariucuaaanu, tama Pueyaso sequesanojaariija naajiotasaaquiaari. Naa sequeyari:

“Janiyari taucuaa jiyaramiquiniutianiya cua saquiriojosano Israel pueyacuani, cua sequenu panishano nojori pohuatanura cua pueya. Cua pueya niishiyaquishoo rupaacajinia pohuatanutaniyari. Naajaa, niishiyaniija, tahua pohuatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniajaaja pohuataaariquiaa”.

²²Naa Pueyaso sequesacaritij, paari niishiyani, Pueyasoori tamaatia rupaacata na tojiyashijiaca tojitini saniniujuquiaa na rupaa juucua. Paari saniniuuja tari na rupaa tojitiajaca cutarani. Naaratej, majaari socua panishano Pueyaso sequenura pajaniya pa niishishoo rupaajinia, na tojitiniuria pajaniya nojuaja. Pueyaso sequenu panishano caminiujiushano cutaraari

pajaniyara. Cunocuaajaari tama pa rupaajiniaaja. Cunoori maja Pueyasocua tiuyashijacara. ²³Naaratej, Pueyaso pueya maapue rejerosacari, saaja secaja niajanijajiniinio cuaara pocuaara niishishoo rupaacajinia. Naa pocuanu nia tarinitiare quenaaja, tamasaca Jesuucua tiuyashijaca quishacari nia rerejojuajinia, nojori mariqui jiyaniiri: “iNio pueyaqui puetunu paatecoorijihuana-jaj!” ²⁴Saniniuujia, puetunu niajanijajanaa jaara Pueyaso sequenu panishano caminiujiya tama nia rupaajiniaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatiniutianiya sesa mijia na quiniucua. Tama nojuajaari nia niishiniutianiya: “iJaniyaqui sesa mijia Pueyaso niqiarani!” ²⁵Nia pohuatasano Pueyasojinijii puetunu sesa na miishanojuanaa na niishitiniutianiya noojiajinia. Nocuaji, nojuajaari Pueyaso tojijia quiniutianiya. Sequenutaniyari: “iPueyasoqui seetanujanaa nia taji nia quia!”

Puetunu nia miirijianaa maninia. Majaari nia riutiocojonu tamonu pocuasacari

²⁶Naaratej, cua tojitia taa nia miiniutianiyani cuarta Pueyaso muerasunaa. Naa nia miiri nia rejerosacari. Puetunu nia miishanojuanaa cuaara quiiria nia cumaquitioonura, socua maninia Pueyaso tojitianaara nia quiniuria. Naacuajitij, Pueyaso Sohuanu cumaacata, tamonu naasucuaari jaaquequejonutaniya. Tamonu naasucuaari Pueyaso rupaa niishitiojonutaniya. Tamonu naasucuaari Pueyaso Sohuanu niishitiojosano noojiajinia caminiujiniutianiya. Tamonu naasucuaari niishishoo rupaajinia pocuanutaniya. Na nuhuaji, tamonu cuaara na pacuura nia rupaajinia,

maninia nia tojiniuria. Naa nia miiri maninia. Niquiriyatujua cuaara pocuaara coteenu, na nuhuaji tamonu, na nuhuaji socua tamonu. Naate nia miiri. Majaari nia riutiocojonu tamonu pohuatasacari. ²⁷Niaa jaara niishishoo rupaajinia pocuanu paniri, cuaara pocuaara saa querajaa pueyaja, maja socua. Cuaara pocuaara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuaara pacuura pueya rupaajinia, niishishoo rupaajinia nia sequesano, pueya tojiniuria maninia. ²⁸Niishishoo rupaa pacuna quiaquishacari, cuaara pocuaaquiiria cante tamaatia rupaajinia pocuanu paniriquiaa nia niquiarani. Na naata sanaa pocuanu noojiajinia tamajaja, saa Pueyaso niqiaraja.

²⁹Naajuhuj, niaa jaara Pueyaso Sohuanu niishitiojosano nioojiajinia pohuatanu paniri, cuaara pocuaara saa querajaa pueyaja, maja socua. Na nuhuaji, Pueyaso Sohuanu cumaaca jiitianaa cuaara saniniujiiuura nia pohuatasano, nia niishiniuria, cunote seetanujanaa Pueyaso Sohuanu niishitiojosano, maja soj. ³⁰Nia pohuatasacari Pueyaso rupaa, tamonu jaara pohuatanu paniya shusha Pueyaso Sohuanu niishitiojosano noojiajinia, cante pohuataajaani cuaara sanaajeera, na tarajana pocuanura. ³¹Naacuajitij, puetunu Pueyaso niishitiojosano jiitianaajanaari na naata na pohuatanu. Naaratej, niquiriyatujua cuaara pohuataara, na nuhuaji tamonu, na nuhuaji socua tamonu. Naacuajitij, puetunu niajanijajanaa na naata pohuatanu nia niishishano Pueyasojiniji. Naacuajitij, puetunu Pueyaso muerasujanaari maninia niishitiojosano quiniutianiya, maninia cumaquishanojuhuaj, maninia nia miiniuria. ³²Maja timia

pocuanu jaarajaaja tamonu pocuasacari. Majaari Pueyaso Sohuanu pocuatenu tari niajaniya, tari tamonu pocuasacaricuaa. Nia naata cutaraari sashiniu nia pocuanu-
 ra. ³³Pa Pueyaso cutaraari maninia miiijajanaa. Maja cushitiojjuua. Naarate pueyanaa, maja tamasaca pocuasacari pa riutiocojonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuaara naa miiria na rerejosacari. ³⁴Maajipohua cuaara sanaa tojtiaara Pueyaso rupaa pohuatasacari. Maajipohua cuaara niishitiojiyaquiiria pueya niquiara. Maajipohua cuaara tojijiaa quiiria, taa pa niishitiojosaa-
 quiaari Moisés Rootasanojinijicuaajani. ³⁵Maajipohua jaara niishiniu paniya socua pohuatana niishitosanojiniji, nojori cuaara nequesotohuara neyaca tama na tiajiniajaaja, na que maaraja. Cararaatia cutaraari maaji jaara nequeso-
 reetare caya pohuatasacari, Pueyaso muerasu rerejojuajinia. ³⁶Nia tojiri nio cua rootasano pueyanaa. Niaacuajaari niishiya, Pueyaso rupaari supueyaqui-
 quiaari niajanijajiniji. Naajuhuaaj, majaari Pueyaso rupaa pohuatanaa jiyaramiquiniu quishaaquiaari saa niaacuaja. Tamonu jiyacajinia, queraatia Pueyaso pueya maapueeri cua niishitiojo-
 sano tojtiaquiaa maninia cutara.

³⁷Niajanijajinijinio, noojiaqueya pueyari Pueyaso Sohuanu cumaaca jiitiaa, nia niishiniuria cana cumaacata tamonu pueyano niishitiojiyani. Naacuajitij, ¿taa nia sequeyani? ¿Majate Pueyaso Sohuanu niishitiojosano cua sequesano niajaniya? ³⁸Cante nio niishiniu paniyaquiyani, cuno jiyoteeri maja Pueyaso Sohuanu cumaacaraca quijia. Cuno pueyano cuaara tojiyaquishaaria saniniujia.

³⁹Naacuajitij cuarta Pueyaso muerasu-
 naa, nia jiaatiare Pueyaso Sohuanu cumaaca nia jiitianura, pueya niquiara

nia pohuatanura Pueyaso Sohuanu niishitishano niajaniya. Naajuhuaaj, majaari nia tenujunu noo pojori, canapueite niishishoo rupaacajinia pocuanu paniyani, Pueyaso Sohuanu cumaquishacari nojori. ⁴⁰Nareja maninia nia miiriquia puetunujuanaa. Naacuajitij, niquiriyatu cuaara pocuara coteenu, na nuhuaji tamonu, na nuhuaji socua tamonu.

Cristo samiitiasacariuhua

15 ¹Cuarta Jesuucua tiuuniaanaa, Jesucristo rupaa nia niishiriohua, tarijia cua pohuatasano niajaniya, nia jiyanooshaanurani. Niaari nocua tiuquiaari maninia. Niaari quiarijia maninia na tojtiaajaa. ²Naacuajitij, Jesucristoori niaacuaji tacuquiaa quiarijia, maninia nia tojtiasacari na rupaa, taa cua pohuataquiaari niajanijia-
 cuajani. Niaacuajaari Pueyaso pueyara jatanishano quiya niaa jaara maja najuhuaana na rupaa tojiyaquiquiaari. ³Janiyari niaara caminiujuquiaari Jesucristo rupaani, taa cua tojiquiaari-
 cuani. Nio cutara rupaa nia coteetaquiaari pohuatanunijia: Cristoori pocuara cusoquiaari niyacutesanojinia, sesa pa miiniuucua. Tariucuacaanu Pueyaso sequenu panishano caminiuju-
 niaari naa naajiotaquiaari, taa Cristo miishaanutaniya naquiyani. Seetanujua-
 naa naa miishaaquiaariiri. ⁴Jesucristo cusonu nuhuaji, raaco niasaaquiaariiri. Jiuujianaraca juuca jaara na shoconuju-
 quiaari macu na quishacari, na raaco samiitiaquiaariuhuari. Naa tohuatee-
 quiaariiri puetunu tariucuacaanu Pueyaso Rupaaajanaa, taa nojuajiniji naajiotasaa-
 quiaaricuaajani. ⁵Na nuhuaji, Jesucristoori Pedroocua muetaquiaariuhua. Na nuhuaji, na jiyaramiquishocoriquiano pueyacua muetaquiaarijiuhuaj. ⁶Na nuhuaji, muetaquiaarijiuhuaj na

tojitianaa rerejosaquiiri. Socua quiniento* pueyari na niquitiaquiaari jiyacari. Queraatia jiyacari na niquiniaajinijinio pueyari saminio quiyajaa. Noojiaqueyari tari shaajecocanu. ⁷Na nuhuaji, pa Jiyaniijiaari Santiagoocua muetaquiaari-jiuhuj. Na nuhuaji, muetanu pacutequiaariuhua na doce jiyaramiquishocoriquiano pueyacuaari.

⁸Puetunu cuno pojori nuhuaji, Jesucristoori socua cucua muetaquiaarijiuhuj, nocua tiuujia cua quiyaquishacarijia. Naa na paraca cua quishacarijiatej, Jesucristoori cucua muetaquiaari na jiyanooniuria janiya. Ritia cua jiyatequiaariiri na jiyaramiquishano cua quiniuriajuhaaj. ⁹¿Casaaraquitijia na saquirojoquiaari janiyatejaj, na jiyaramiquishano cua quiniuriajuhaaj? Janiyari puera sesa miiijia quiquiaarini cua niishiyaquishacari Jesucristo. Cucua na muetaaquishacarijia, janiyari Pueyaso saquirojosano pueya miitiaquiaarini. Cuarta Jesucristo jiyaramiquishano pueyari maja naa sesa miijiaca na quituniu quiquiaari. ¹⁰iPueyasoori jiyanoohua maninia! Cua jiyanooquiaariiri Jesucristo jiyaramiquishano cua quiniuriajuhaaj, taa cua quiya quiarijia-cuajani. Naa quianijia Pueyaso jiyanooniucua janiya. Majaari najuhua-na na jiyanooni quiquiaari janiya. Na jiyanooshacari janiya, janiyari socua jiyanoohua nera poonijiocanu cuarta Jesucristo jiyaramiquishano pueyajinijini. Naajaa, maninia cua poonijosanoori maja tama cua miishanojuaaja na quiniu. Pueyasocuaajaari cua cumaquiquiaa na Sohuanuta, maninia cua miiniuria na panishano.

¹¹Naacuajitij, naa sequeriquiaa niajanianijia: cante nia pohuataquiaari Jesucristo rupaani, naajaa. Janiyari Jesucristo rupaa pohuataquiaajaacuhuj, mariyata taa cuarta Jesucristo jiyarami-

quishano pueya pohuataquiaacuaani. Majaari rimiajata canaa pohuatasano. Niaari cuno rupaacua tiuquiaari maninia.

Pueyaso muerasu macunucua samiitiasacariuhua

¹²Cuarta Jesuucua tiuuniaanaa, canaa jaara pohuatariquiaa taa Cristo samiitiaquiaariuhua macujinijini, ¿casaara noojiaqueya niajanianijinio sequequiaani: “Macunucua maja na samiitiaconu quiniutianiuha”? ¹³Macunucua jaara samiitianiyaquishaanutaniya taa nia sequequiaacuajani, Jesucristo jiyoteeri macu quiyajaacuhuj. ¿Cristoteeri macu quiyajaa? ¡Maja! ¹⁴Cristo jaara macu quiriQUIAJA, canaa maara najuhuaana pohuataa na rupaani. Naajuhuj, niaa maara najuhuaana Jesucristoocua tiuya, na pueya nia quiniu paniniuria juucua. ¹⁵Canaacuajaari pohuatanuuquiaani Pueyasoori Jesucristo samiitianiquiaariuhua. Macunucua jaara samiitianiyaquishaanutaniya taa nia jiyaniquiaacuajani, canaa jiyoteeri sapojonuujuaa Pueyaso jiyaramiquishano pueyani. Naacuajitij, nia sequesano jaara seetanujuanaa quiri, maja jiyoteeri Pueyaso samiitianini quiquiaariuhua Jesu. Saniniuujia, iniaari jiyajeneya cutara! ¡Pueyasocuaajaari seetanujuanaa Jesu samiitianiquiaariuhua! ¹⁶Macunucua jaara samiitianiyaquishaanutaniya taa nia sequequiaacuajani, Cristo maara samiitiaquiquiaariuhuj. ¹⁷Cristo jaara samiitiaquiquiaari, niaa jiyoteeri Cristoocua tiuya najuhuanaj, Pueyaso na jiyanootiniuria juucua niajanija. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhaaj. ¿Naatejaaratej? ¹⁸Cristo jaara macu quiriQUIAJA, tariucua shaajecono nocua

tiuninaa pueya maara taraatia quiriquiaj. Nojori maara taraatia shaajecanu puetunurajanaa, maja quenaaja nojori samiitiaconuhua. ¹⁹Pa Janiyajuhua, canapue te saminio quiyajaani, paa maara jiyano hua taraatia quiyani, pueyaracaanu najuhua na quia pa miishacari mijiria. Jaara naa quiriritij, pa Jiyaniijia Jesucristo jaara macu quiriquiaja, paa maara najuhua poonijioriquia pa shuquiriti-niuria nojuaja juucuan.

²⁰i Namitia naa quiyaquiyari! iCristoori seetanujanaa samiitianishaaquiaari-hua! iCanaari na niqitiaquiaarini! Naacuajitij canaari niishiyani Jesucristoori saminio quiyacuaaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuaatej, naacuajitij paari niishiyani puetunu shaajecono nocua tiuninaajanaari samiitianishaanutaniuhuaacuhua. ²¹⁻²²Paacuajaari niishiyani, pa supuetana Adánri coteenujanaa shaajequiaari, Pueyaso na tojiyaquiniucua. Naacuajitij, puetunu nojuajiniji supuenajanaari shaajecoquiaajuhua. Adán nuhuaji, parta pueyano Jesucristoori saniniuujia Pueyaso tojijia quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua tiuninaajanaari samiitianishaanutaniuhua, pueyaracaanu saminio pa quiniuhua pa Jiyaniijia. ²³Pa Jiyaniijia Jesucristoori coteenu samiitiaquiaariuhua. Cristo nuhuaji, puetunu nocua tiuninaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacari. ²⁴⁻²⁶Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutaniuhua, na tucuataniuhua puetunu na Que panishanojanaa. Na Queeri na jiyaronutaniya puetunu na paraajanaa na puecoonura. Jesucristoori Jiyaniijiajanaa

quiniutianiya, na Que cuaara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaano. Sesaacaari jatasaanutaniyajuhua, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuana shaajanutaniyajariuhua. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jiitiasano quiriohua, Jesucristoori na Que na niqitionutaniuhua, na Que jiitianuhua puetunujanaa.

²⁷Na Que Pueyasoori Jesu jiyatequiaari Jiyaniijia na quiniuria jiyano hua na cumaacata. Naacuajitij, nojuajaari na naata puetunu casaajanaa na tojitaniniu. Nojuajaari Jiyaniijiajanaa. Saa na Que Pueyasojuaari socua Jiyaniijiajanaa, maja tamonu. Pueyasojuaari Neyanu jiyaroquiaari puetunu na shipinishanojanaa na jeenucuanura na cumaacata. ²⁸Na tucuatascari, pa Jiyaniijia Jesucristoori na Que sequenutaniya: “Cua Quena, tari tucuatatee quia panishanoni. Puetunu quia paraajanaa quejoore tarinijia. Majaari socua sesa na miiniu quiniutianiya. Saa quiajanijajaari pueyaracaanu Jiyaniijiajanaa quiniutianiya cutara, maja socua tamonu”. Naacuajitij, pa Que Pueyasoori Jiyaniijiajanaa quiniutianiya pueyaracaanu, puetunu na shipinishanojanaa na jiitianura maninia.

²⁹Socua nia niishiriojore pueyanaa. Naa jaara jiyaniyajaa macunucuaari maja na samiitianishaanu quiniutaniuhua, ¿casaara pueya tiuquiniijosaaquiaa moojinia macu nitini, cuno macu jaara na shaajeyaquishacarija Jesucristoocua tiuuri? Paa jaara tiuquiniijosaaquiaa

Jesucristoocua pa tiuushacarini, paari miriqui miyani taa pa Jiyaniijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuani. Naajuhua, paari mariyata samiitianishaanutaniuhua. Niaari sequeya macunucuaari maja na samiitianishaanu quiniutianiuhua. ¿Naatejaaratej? Macunucua jaara samiitianijiaquishaanutaniuhua taa nia jiyaniyacujani, ¿casaara pueya tiuquini-jiosaaquiaa shusha shaajeno macu niticuaraarini?

³⁰Paa jaara samiitianiyaquishaanutani-yani taa nia sequequiaacuajani, canaaquiiri najuhuaana tama canaa cuaqueyajaaja panitiaquiaani, pueyara-caanu canaa poonijiosacari pa Jiyaniijia. ³¹Seetanujanaa nia sequeyanijia, janiyari jiyano-hua shuquiriaatia quiyani, Jesucristoocua nia tiuushacari, cua pohuatanuucua na rupaa nijaniya. Seetanujanaajaariuhuaj, pueyari cua monu paniquiaa pueyaraca-nuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhua. ³²Pa Jiyaniijia jaara macu quiya taa nia sequequiaacuajani, janiyaqui najuhuaana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereeta sayoru quiriquiaa cucuaji. Janiyaqui najuhuaana Jesucristo shuquiri-tiriquiaa juucuani, nojuaja jaara samiitianiyaquishaaquiaariuhua. Paa jaara samiitianiyaquishaanutaniyani, pa miriqui taa Pueyaso tojiyashijiaca sequequiaacuajani: “Pa shuquiriri saminio pa quishacarijia. Pa queranacu-nuure. Pa mashaasequenuurejuhuj. Naajaa, pa shaajesacari, pocua puetunu shaajequeejanaani”. Naa sesa miiquio-

quiaari noo pojori, canapuate jiyaniyani macunucuaari maja na samiitianishaanu quiniutianiya.

³³Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhuj. Tamonu pueyanoori naa sequequiaari seetanujanaatej: “Maninia miiijaari sesa miiijara jatanishaaree na cojiniuucua sesa miiijaca”. Naaratej, majaari nia cojinu sesoriquia pueya, niaa mariqui seserejaariuhuj. ³⁴Niishiriojojuara nia quiri. Sesa nia miiniu nia cartere. Noojiaqueya nijaniyajinijinoori Pueyaso niishiyashi-jiaa quiyajaa. Naa nia sequereenijia pueyanaa, quenaaja nia caririquiniuria.

Taamueca pa quiniutianiuhua ni pa samiitiasacariuhua

³⁵Tamonu nijaniyajinijinio naasucuaari niishiriojiya: “¿Taa macunucua samiitianijiosaanutaniuhuaajarani? ¿Taamuecate na cuaqueya quiniutianiya-ni?” ³⁶Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaa-quiniatejaj. Saa na co moquesacarijia na naata moritianu. ³⁷Naajuhua, niaa jaara saaco natate, tamaatia jajaujuhuj, nia natasano jajauri maja juhua neyonarano niquishano. Nia natasanoori saaja shiitianiyojua jajau quiya. Na moritiasacari, jiyano-hua tamaatia niquishiyari. ³⁸Pueyasoori na maashitiya puetunu na jaamasucuatajanaa, taa na paniyacuajani. Pueyasoori puetunu jajaujanaa moritiani-jia tamaatia niquishano na quiniuria. Naa quiniutianiyaajaruhua macunucua samiitiasacariuhua. Majaari pa cuaqueya quiniutianiya taa na quiya quiarijiacujani. ¡Pa cuaqueyari jiyano-hua maninia quiniutianiuhua!

³⁹Majaari puetunu cuaqueyaraca casaajanaa mariyata na quiniu. Naacuajitij,

pueyano cuaqueyari tamaatia quiya casaa cuaqueyajiniji. Shuhua cuaqueyari tamaatia quiyajuhua. Sapitiaaja cuaqueyari tamaatia quiyajuhua, moojinia na quiniuria.

⁴⁰Jiyocuacaanu quijiacaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajiniji. ⁴¹Naajuhua, pananuuri jiyanoehua shacantuuca quijia. Raca shacantuucaari tamaatia niquishano pananu shacantuucaginiji. Riya shacantuucaari socua tamaatia niquishano. Naajuhua, puetunu riyajanaari tamaatia niquishano narta riyajiniji. Puetunu Pueyaso shipinisha-nojuanaari naa tamaatia quiya.

⁴²Naajuhua, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiacaari saniniuuja samiitianishaanutaniuhua, pueyaracaanu na quiniuria. ⁴³Jamosano pa quete sequeeri samiitianishaanutaniuhua, jiyanoehua shanohua niquishano na quiniuria. Cumaacaaju jamosanoori samiitianishaanutaniuhua jiyanoehua cumaacaraca na quiniuria. ⁴⁴Pa cuaqueya jamosanoori saaja jiyacua rucanejaca quiquiaari. Paari samiitianishaanutaniuhua tamaatia cuaqueyata, jiyocuacaanu quijia pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucanejonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiririnij.

⁴⁵Pueyasoori coteenu pa supuetana shipiniquiaari marajiniji. Na nuhuaji, na samiitianiquiaari. Moisés Naajioneejiniaari naa naajiotasaaquiaritij:

“Adánri saminiora quiquiaari Pueyaso nooshacari na jiquioco”.

Jesucristoori saniniuuja jiyatesaaquiaari juhua pa supuetanara na quiniuria pa

supuetana Adán niti. ¡Jesucristoori jiyanoehua socua cutara Adánjiniji! Adánri samiitianishaaquiaari saminio na quiniuria. Jesucristo cutaraari pa samiitianijiajanaa na Sohuanuta. ⁴⁶Coteenujanaa pa supuetanani, majaari na shipinishaanu quiquiaari jiyocuacaanu quijiarano. Cunora, coteenu pa cuaqueyari saaja mijiria quijia. Na nuhuaji, pa cuaqueyari jiyocuacaanu quijia jatanishaanutaniya mariyata juhua Jesucristo cuaqueyara. ⁴⁷Adánri saaja mijiria quiriquiano quiquiaari. Marajiniji shipinishaaquiaari. Jesucristoori saniniuuja jiyocuacaanujinio. ⁴⁸Puetunu Adáncuajinio supuenojanaari saaja mijiria quijia. Naaratej, puetunu pajaniyanaari saaja cusunuujuacani, juhua pa supuetana Adánjuhua. Jesucristo muerasuuri saniniuuja juhua pa Jiyaniija Jesucristo quiniutianiya, jiyocuacaanu quijia pa quiniuria. ⁴⁹Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiarijia socua maninia Adán cuaqueyajiniji. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuacaanu Quijia cuaqueya. Nojuacajaari pa samiitianinia Jesucristo.

⁵⁰Cuarta Pueyaso muerasunaa, maja pa naata Pueyaso rupeenu nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupeenu.

⁵¹Naajaa, cua tojitiare. Nia pohuatareera pueya niishishoo. Majaari puetunu pajaniyanaa cusunuuquianoni. Puetunu pa cuaqueyanaa cutaraari jatanishaanutaniya, maninia cuaqueya pa jiitianura, juhua Jesucristo cuaqueyajuhua. ⁵²Jiyocuacaanuji trompeta jonesacari, pa cuaqueyari ritia jatanishaanutaniya, naatej, taa pa nimishiniuquiya ritiacuani. Pa Jiyaniija

naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiiquioonu-ra. Canapuate macu quiyani, quiarinio cuaqueyata ritia samiitianutaniuhuari. Pajaniyajuhuaj, canapuate saminio quiyajaani, pa cuaqueyari ritia jatanishaa-nutaniyajuhuaj, quiarinio cuaqueya pa jiitianurajuhuaj, shaajeyashijiaca pa quiniuria. ⁵³Cusonuuja cuaqueya cuaara jatanishaaria, rishijia cuaqueya pa jiitianura saniniuujia. Nio moqueja pa cuaqueyani, jataniniu panishiyari, maninia cuaqueya pa jiitianura, pueyara-caanu pa quiniuria Pueyasota.

⁵⁴Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucuacaanu sequesanoori tari tohuateeree. Naa naajiotasaaquiaari tariucuacaanu Pueyaso Rupaaajinatej:

“iJeje! iPa Jiyaniijiaari na muerasu mashiquirri macunucua quiquojini-ji! ⁵⁵Cusojuananaa, iquiaaqui tari shocotasaree! iQuiaari shocotasaree! Sesaacanaa, quia cusojutajaari juhua mohuacara quiqui cumaacaju. iShaajeconoori samiitiacoree!”

⁵⁶Pueyanaa, puetunu pajaniyajanaari cusonuuquiaa sesa miijiaa pa quiniucua mijiriani. Paari sesa quiquiaani pa tojiyaquishacari tariucuacaanu Moisés Rootasano Pueyasojiniji. Naaratej, puetunu pueyajanaari cusonu niishiya. ⁵⁷Naajaa, pa Jiyaniijia Jesucristo miishanota pocuara, Pueyasoori pa mashiquiquiaa pa cusoyaquiniuucua. Naaratej, paari Pueyaso sequequiaani: “iPaacarasho canaa Pueyasonaa! Quiaacuajaari canaa shocotaniutianiya cusonu, quia Niyanu cusonucua canacuara, pueyaracaanu canaa quiniuria quia shuriucua. iJiyano-hua paacarasho!” Paari naa maniniuhuaqueetaa pa Que Pueyasoni.

⁵⁸Naaratej cua panishano pueyanaa, nia numaama nia racatare cua niishitiojosano niajaniya. Saa Pueyaso rupaja nia tojitiare, maja tamaatia niishitiojosano. Pa Jiyaniijia nia poonijiore socua jiyano-hua, na panishano nia miiniuria saaja. Pa Jiyaniijia nia poonijosanoori maja najuhuana na quiniu.

Casamiijiuniucua Pueyaso pueyara cumaneeca reratesacari

16 ¹Quiarijiani, nia riucaareera taa nia miiniutianiya, cumaneeca nia reratenura casamiijiuniucua. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Niaa cuaara maninia miiria, mariyata taa cua rootacanucua Pueyaso pueya maapue Galacia jiyajiniani. ²Naa nia miiritij. Puetunu domingo* juucajanaa, puetunu pueyajanaa cuaara racataara tama na niqutiosocoriqiano cumaneeca, teyano nia niqutionutaniya niarta Pueyaso muerasuracuajani. Naa nia racatare juhuataja nia niqutiosocoriqiano cumaneeca puetunu semaanajanaa*, maja na reratesaanura shusha cua tiuquishacari niaacua. ³Niocua maninia pueya saquiriojore, nia niqutiojosano cumaneeca nojori patanura Jerusalén tiacajinia. Naacuaajitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesuucua tiuunaa pueyacuara Jerusalén tiacajinia, nojori cuara shuquiriaatia maseera cumaneecata nia jiyarotasano pueya. ⁴Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuaj.

Pablo naquerejosacari

⁵Cua quiasacari niaacua, janiyari Macedonia jiya tajiniu paniani. Na nuhuaji, janiyari niaacua tiuquiniutianiya-ni. ⁶⁻⁷Janiyari maja ritia cua tajiniu panini niajaniya. Niaata camueenujunu pania pueyaracaanunijia, pa Jiyaniijia jaara naa

paniyajuhuj. Janiyari shuniya shocotenu paniya niaatani. Na nuhuaji, nia naata cua naacunu cua jiitianura cua panishano, cua pasocoriquiano tee Pueyaso jiyaronu paniya janiyacujani. ⁸⁻⁹Janiyari niya Éfeso tiacajinia camueenujiyajaarani, Pentecostés* juuca cua sashishacari. Queraatia pueyari Jesucristo rupaa tojitianu paniya niya. Naajuhuj, queraatia pueyari Jesucristo rupaa ruuretaa saniniujia. Naaratej, janiyari jiyanhua socua Jesucristo rupaa pohuatanu panijajaa Éfeso pueya niquiarani. Naajaa, janiyari niaacua quianutaniyani Pentecostés juucara queranacunuunu nuhuaji.

¹⁰Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteo-cuajaari pa Jiyaniijia poonijioquia mariyata taa cua poonijioquiaacuani.

¹¹Naaratej, maja Timoteo nia rerequetenu. Niocua na naacure saniniujia, cucua na tiuquiniuhua shuquiriaatia, maninia nia miiniucua nera. Janiyari niya na sashiya parta Pueyaso muerasutani. ¹²Janiyari Apolota pocooriquiaani. Janiyacujaaari na nenecojoriquiaa juucuan, niaacua na quianura parta Pueyaso muerasuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutaniyaquiniaari, jaara na naata quiri.

Pablo sequesano, naajionu na puecasacari

¹³Cuarta Jesuucua tiuuniaanaa, niishirio-jojuaca nia quiri. Jesucristo rupaa nia niishiri maninia, seetanujuanaa na tojitianaara nia quiniuria. Juhua cumueeca mashaja nia quiri Pueyaso Sohuanu cumaacata, pa Jiyaniijia panishano nia miiniuria. ¹⁴Puetunu nia miishanojuanaa cuara quiri seetanujuanaa nia paniniutia.

¹⁵Pueyanaa, niaari niishiya Estéfanasri necohuata coteenu Jesucristo tojitianaara quiquiaari cuniqui Acaya jiyajiniani.

Nojoriiri Pueyaso muerasu naacuquiaa pueyaracaanu nojori paniniutia. ¹⁶Naarate nia sequenu paniyanijia, niajaniya cuara quiri juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyanaa, noo pojori canapuate naa maninia miiquiaa Pueyaso muerasucujani.

¹⁷Jiyanhua shuquiririucuanijia Estéfanas tiuquishacari niajaniyajiniji Fortunatota, Acaicotajuhuj. Nojoriiri cua shuquiritiriucuaa nia niti, cua jiaatiasacari cua niquiniuria niajaniya juucua.

¹⁸Nojoriiri coojia cajitiriucuaa puera cua niishiriojiyaquiniucujia niaacua. Nojori naasucuaari nioojia cajitiquianujuhuj, nojori pohuatasacari niajaniya janiyajiniji. Niajaniya cuara shuquiritiaara nojori, naa nojori miishacari maninatej.

¹⁹Pueyaso muerasu maapue niya Asia jiyajiniaari cua sequerucuaa, cua saruhuatana niajaniya. Aquila, Prisciliano, nojoriiri jiyanhua nia saruhuataajuhuj, narta Jiyaniijia muerasu nia quiniucua-juhuj. Pueyaso pueya maanuuri nia saruhuataajuhuj, nooj, teyanote Aquila tiajinia rerejoquiaacuajani. ²⁰Puetunu parta Pueyaso muerasujuaanari niya nia saruhuataajuhuj. Nia saruhuatatoosacari, nia saruhuatatoore seetanujuanaa Pueyaso paniniutia.

²¹Quiarijiani, tama cua juaashiquiatajaaja saaja nioniyojua naajioreeraj, cua saruhuatana niajaniya. Naacuajitij, niocua niishiri nio naajioneeri seetanujuanaa janiyajiniji.

²²Cante maja pa Jiyaniijia panijia quiyani, Pueyaso cuara jataara cuno, saniitiosocoriquiano.

iJiyaniijianaa, quia nimiohua!

²³Pa Jiyaniijia Jesu cuara cumaquiri niajaniya na Sohuanuta. ²⁴Janiyari puetunu niajaniyajanaa paniyani Jesucristo paniniutia. Tariucuaaja, cua panishano pueyanaa.